

1:1 No so Daroma Li fatua lõ muwõwõi gulidanõ. Fao khõ Lowalangi Daroma Li andrõ, ba Taroma Li no Lowalangi. 2 Fatua lõ hadõi ulidanõ no so Daroma Li andrõ si fao khõ Lowalangi. 3 Iwõwõi hadia ia fefu Lowalangi faoma Taroma Li andrõ. Ma'ifu lõ hadõi ba gulidanõ andre niwõwõi baero-Nia. 4 Taroma Li andrõ zame'e fa'auri, ba fa'auri andrõ zame'e haga ba niha. 5 Lõ mamalõ muhaga zi haga andrõ bakha ba zogõmigõmi, ba tebai itayaigõ haga andrõ sogõmigõmi. 6 So niha nifatenge Lowalangi ba wangombakha haga andrõ ba niha. Yohane dõinia. 7 So ia ba wangombakha turia andrõ ba niha fefu, ena'õ mamati ira ba haga andrõ. 8 Tohare ia ba wangombakha haga andrõ; ba tenga haga ia. 9 Haga sindruhundruhu haga andrõ -- haga si mõi ba gulidanõ ba wohagaini fefu niha. 10 No so ba gulidanõ Daroma Li andrõ. Ba hewa'ae Ifazõkhi gulidanõ Lowalangi andre si fao Taroma Li, ba lõ sa'atõ aboto ba dõdõ niha gulidanõ Ia. 11 Mõi Ia ba mbanua-Nia, ba hiza lõ latema Ia. 12 Ba so õsa zanema Ya'ia ba mamati ira khõ-Nia. Ya'ira andrõ zi tobali ono Lowalangi. 13 Tobali ira ono Lowalangi tenga bõrõ wa'atumbura ma zui bõrõ nga'õtõ wa'aniha, ha bõrõ me Lowalangi samõsa zombali'õ ya'ira ono-Nia. 14 No tobali niha Daroma Li andrõ, ba no I'agõ gotaluada. No ta'ila lakhõmi-Nia, lakhõmi nitema-Nia fa'a'ono Lowalangi si ha sambua. Bõrõ ba khõ-Nia I'oroma'õ samõsa Ia Lowalangi, awõ wa'omasi-Nia khõda. 15 Yohane zamaduhu'õ Ya'ia. Mu'ao Yohane imane, "Da'e Ia zi no uwa'õ tohare dania Ia furigu; ba hiza, abõlõ ebua Ia moroi khõgu, bõrõ me no so Ia fatua lõ si tumbu ndra'o." 16 No fondrege wa'omasi-Nia ita, ba lõ mo'aetufa Ifahowu'õ ita. 17 Ba khõ Moze Ibe'e khõda goroisa-Nia Lowalangi, ba hiza, khõ Yesu Keriso I'oroma'õ samõsa Ia Lowalangi awõ wa'omasi-Nia ita. 18 Samõsa lõ sangila Lowalangi, ba ono Lowalangi si ha sambua andrõ zi fao khõ Lowalangi, sahatõ sibai khõ Nama, Ya'ia zangoroma'õ Lowalangi khõda. 19 Ira samatõrõ moroi ba niha Yahudi, ya'ia ndra ere awõ moroi ba mado Lewi, lafatenge khõ Yohane ba wanofu khõnia, "Haniha ndra'ugõ?" 20 Lõ ibini'õ da'õ Yohane. Ifaduhu'õ imane, "Tenga ya'o Razo Sangorifi andrõ nifabu'u Lowalangi." 21 Lamane wanofu, "Na si manõ, haniha ndra'ugõ andre? Hadia Elia ndra'ugõ?" Imane Yohane, "Tenga." Lamane zui wanofu, "Hadia Sama'ele'õ andrõ ndra'ugõ?" Imana li imane, "Tenga gõi." 22 Lamane, "Na si manõ ombakha'õ khõma haniha ndra'ugõ andre, bõrõ me ma'ombakha'õ wanema li niha samatenge ya'aga ba da'e. Hadia niwa'õu sanandrõsa ba khõmõ andre?" 23 Ihalõ moroi ba mbuku Yesaya sama'ele'õ wanemania li imane, "Ya'odo andre, 'Li niha si'ao ba danõ si mate: Mifadaya lala khõ Zo'aya!' " 24 Niha sanofu andre tengetenge ndra Farizai'o. 25 Lamane wanofu khõ Yohane, "Na tenga Razo Sangorifi nifabu'u Lowalangi ndra'ugõ, tenga Elia, tenga gõi Sama'ele'õ andrõ, hana wa õbayagõ idanõ niha?" 26 Imana li Yohane imane, "Ubayagõ niha faoma idanõ. Ba hiza ba gotaluami so niha si lõ mi'ila. 27 Furigu tohare Ia, ba tenga sinangea na'i ndra'o we'amõi enoni samokai bõbõ mbadagahe-Nia." 28 Alua fefu da'õ ba Mbetania, tanõ ba gatumbukha Nungo Nidanõ Yoridano nahia Yohane wamayagõ idanõ niha. 29 Mahemolu da'õ i'ila Yohane I'ondrasi ia Yesu. Imane Yohane, "Mifaigi! Da'õ nono mbiribiri khõ Lowalangi nibe'e ba wangeheta horõ nõsi gulidanõ! 30 Ya'ia andrõ niwa'õgu si tohare dania furigu ba hiza abõlõ ebua Ia moroi khõgu; bõrõ me no ofõna so Ia fatua lõ si tumbu ndra'odo. 31 Lõ u'ila Ia andrõ ba mbõrõta, ba hiza so ndra'o ba wamayagõ idanõ ena'õ aboto ba dõdõ niha Gizera'eli Ia." 32 Da'e wamaduhu'õ Yohane sanandrõsa khõ-Nia, "U'ila Geheha Lowalangi si so moroi yawa ba mbanua hulõ marafadi, si mõi khõ-Nia. 33 Me inõtõ da'õ lõ u'ila haniha Ia; ba hiza Ifarou ndra'o Lowalangi wombayagõ Ya'ia idanõ, awõ wa Imane khõgu, 'Na õ'ila Geheha Lowalangi si mõi ba niha ba torõi khõ-Nia Geheha andrõ, Ya'ia andrõ dania zombayagõ faoma Eheha Lowalangi.' 34 Imane Yohane, 'Sindruhundruhu no u'ila da'õ ba sindruhu Ono Lowalangi Ia; ya faduhu dõdõmi!' " 35 Mahemolu da'õ, so zui Yohane ba nahia andrõ awõ nifahaõnia darua. 36 Me i'ila Itõrõ Yesu, imane, "Mifaigi! Da'õ Nono Mbiribiri Lowalangi." 37 Me larongo nifahaõ Yohane andrõ si darua niwa'õnia, maoso ira la'o'õ Yesu. 38

Ifaigi furi Yesu, ba I'ila wa la'o'ō Ia. Imane Yesu, "Hadia ni'aluimi?" Lamane wanema li, "Hezo nahia-U omo, Rabi?" ('Rabi' eluahania guru.) 39 Imane Yesu, "Mi'aine mifaigi samōsa." Fao ira khō-Nia ba la'ila hezo nahia-Nia omo. Torōi ira khō-Nia ba zi ma'ōkhō andrō. Mato bōzi ōfa tanō owi me inōtō da'ō. 40 Samōsa ba gotalua zi darua andrō, zi no mamondrongo niwa'ō Yohane si no fao khō Yesu ya'ia Gandrea, talifusō Zimoni Fetero. 41 I'aliō Andrea wanggalui Simoni, talifusōnia, ba imane khōnia, "No falukha ndra'aga Mesia, Razo Sangorifi andrō nifabu'u Lowalangi!" (Mesia, eluahania Keriso ba li Yunani.) 42 Aefa da'ō ifasao Andrea Zimoni khō Yesu. Itōngō Zimoni andrō Yesu, ba Imane, "Simoni ndra'ugō, ono Yohane. Tebe'e tōiu dania Kefa." (Kefa ba li Heberai'o, ba ba li Yunani tetōtōi Simoni, eluahania gowe.) 43 Mahemolu da'ō numalō ba Galilea Yesu. Falukha Ia khō Wilifo, ba Imane khōnia, "Tabu o'ō Ndra'o!" 44 Moroi ba mbanua Mbetisa'ida Wilifo, banua ndra Andrea ba Fetero gōi. 45 Falukha Wilifo khō Natanaeli ba imane khōnia, "No falukha ndra'aga ba nahia nitōtōi Moze bakha ba mbuku Huku Lowalangi, awō nitōtōi ndra sama'ele'ō. Ya'ia Yesu ono Yosefo moroi ba Nazareta." 46 Imane wanema li Natanaeli, "Hadia tesōndra zi sōkhi moroi ba Nazareta?" Iteba li Filifo, "Aine ae'e faigi." 47 I'ila Yesu i'ondrasi Ia Natanaeli, Imane Yesu sanandrōsa khōnia, "Da'e zindruhu niha Gizera'eli, lō falimosa khōnia!" 48 Iofu Natanaeli khō Yesu, "He moroi wa Ō'ila zanandrōsa khōgu?" Imane wanema li, Yesu, "Fatua lō ikaoni ndra'ugō Filifo, me so ndra'ugō barō ara andrō, no U'ila ndra'ugō." 49 Imane Natanaeli, "He Amagu Guru, Ono Lowalangi Ndra'ugō! Razo niha Gizera'eli Ndra'ugō!" 50 Aefa da'ō Imane khōnia Yesu, "Hadia faduhu dōdōu me Uwa'ō no U'ila ndra'ugō ba narō geu ara andrō? Ō'ila dania ngawalō zabōlō ebua moroi ba da'ō!" 51 Ba Imane khōnia Yesu, "Ya faduhu dōdōmi, mi'ila dania teboka mbanua si yawa, manōrōnōrō mala'ika khō Nono Niha nifatenge Lowalangi."

2:1 Dua ngaluo aefa da'ō so walōwa ba Kana ba mbanua Galilea. So nina Yesu ba da'ō. 2 Ba no lakaoni gōi Yesu awō ndra nifahaō-Nia ba da'ō. 3 Me no ahoi fefu nagu, imane ina-Nia khō Yesu, "No ahoi khōra nagu." 4 Iteba li Yesu, "He Ina, bōi o'ou Ndra'odo. Lō inōtō khō-Gu nasa wamalua hadia ia." 5 Imane ina Yesu khō ndra sohalōwō ba da'ō, "Na Iwa'ō khōmi hadia ia, mi'o'ō." 6 So ba da'ō ōnō rumbi nahia nidanō si no muhenagō, soguna ba wanasai botorā molo'ō amakhoita agama niha Yahudi. Dozi rumbi andrō tola mufo'ōsi idanō walu ngafulu irugi otu lite. 7 Imane Yesu khō ndra sohalōwō andrō, "Mifo'ōsi rumbi andrō faoma idanō." Ba lafo'ōsi rumbi fefu faoma idanō. 8 Imane khōra Yesu, "Mihalō nidanō da'ō iada'e ba mi'ohe khō zatua sambambaya halōwō." Ba la'ohe nidanō andrō khō zatua sambambaya halōwō, 9 itandra nidanō da'ō satua sangai halōwō, si no tobali agu. (Lō aboto ba dōdōnia heza moroi nagu andrō, bōrō me ha samo'ōsi idanō rumbi zangila.) Ikaoni zatua sangai halōwō marafule, 10 imane khōnia, "Si to'ōlōnia agu si sōkhi mube'e si fōfōna, ba na no oya nibadu dome, awena mube'e nagu si to'ōlō. No ō'ir'ōo nagu sabōlō sōkhi ba awena ōbe'e iada'e!" 11 Da'ō zahōlihōli dōdō si fōfōna nifalua Yesu. Ba Ifalua da'ō ba mbanua Kana ba danō Galilea. Ba zahōlihōli dōdō andrō Iforoma'ō lakhōmi-Nia Yesu. Ba mamati ndra nifahaō-Nia khō-Nia. 12 Aefa da'ō numalō Yesu, ina-Nia, talifusō-Nia awō ndra nifahaō-Nia we'amōi ba Gafana'uma ba torōi ira ba da'ō mato ha'uga ngaluo. 13 Numalō Yesu ba Yeruzalema, me no ahatō Gowasa Fasa niha Yahudi. 14 Ba Nomo Zo'aya ba Yeruzalema Isōndra Yesu zamawa sawi, biribiri awō marafadi; awō zanukari kefe no dumadao ba da'ō. 15 Ifazōkhi mbōzibōzi moroi ba zinali, ba Ifofanō gurifō andrō moroi ba Nomo Zo'aya, biribiri awō zawi. Ibalia'ō meza zanukari kefe irege oi muzawili gefe khōra. 16 Imane ba zamawa marafadi andrō, "Fazawa fefu wofu andre. Bōi mibali'ō nahia waniaga Nomo Nama-Gu!" 17 Itōrō tōdō ndra nifahaō-Nia ayati Mbuku Ni'amoni'ō andre, "Fa'omasigu Nomo-Mō, he Lowalangi, hulō holahola galitō si manga hadia ia." 18 Lalawa Yesu ira salawa niha Yahudi faoma fehede safōkhō. Lamane, "Tandraigō fazōkhi dandra

sahōlihōli dōdō sangoroma wa sinangea Ōlau zi mane da'e!" 19 Itema li Yesu, "Midudugō Nomo Lowalangi andre, ba Ufuli Ufasindro ba zi tōlu ngaluo." 20 Lamane, "Ōfa wulu fakhe wa'ara lafazōkhi Nomo Zo'aya andre, ba Ōfazōkhi ba zi tōlu ngaluo?" 21 Nomo Zo'aya niwa'ō Yesu ya'ia mboto-Nia samōsa. 22 Ba me ifuli auri Yesu moroi ba wa'amate, itōrō tōdō ndra nifahaō-Nia wa no Iwa'ō zi manō. Ba faduhu dōdōra ba zi no musura ba Mbuku Ni'amoni'ō, awō ba zi no Iwa'ō Yesu. 23 Me so Yesu ba Yeruzalema me inōtō Gowasa Fasa, ato niha si faduhu tōdō khō-Nia bōrō zagahōlihōli dōdō nilau-Nia. 24 Ba lō faduhu dōdō Yesu khōra me I'ila zi so ba dōdō niha. 25 Lō moguna mu'ombakha khō-Nia zanandrōsa ba zi samōsamōsa niha, me oi I'ila samōsa hadia zi so bakha ba dōdō niha.

3:1 So samōsa Warizai'o sotōi Nikodemo. Salawa ba niha Yehuda ia. 2 Ba zi bongi mōi ia i'ondrasi Yesu ba imane, "He Amagu Guru, aboto ba dōdōma wa guru Ndra'ugō nifatenge Lowalangi. Bōrō, samōsa lō si tola mamazōkhi sagahōlihōli dōdō si mane nilau-Mō, na lō fao khōnia Lowalangi." 3 Itema li Yesu, "Tōngōni: samōsa lō si tola tobali ono mbanua amatōrōwa Lowalangi, na lō tumbu mangawuli niha andrō." 4 Imane Nikodemo khō Yesu, "Hewisa wa tola tumbu mangawuli niha si no atua, hadia tola ifuli ia ba dalu ninania ena'ō tumbu mangawuli?" 5 Itema li Yesu, "Sindruhundruhu niwa'ō-Gu khōu: Na lō tumbu mangawuli niha moroi ba nidanō ba moroi ba Geheha Lowalangi, tebai tobali ono mbanua amatōrōwa Lowalangi niha andrō. 6 Ba mboto wa'aniha tumbu ita moroi khō ndra satuada, ba hiza na dali wa'a'eheha, tumbu ita moroi khō Geheha Lowalangi moroi ba zorugo. 7 Bōi ahōli dōdōu na Uwa'ō: fefu ita lō tola lō'ō tumbu mangawuli. 8 Isawa zomasi ia angi andrō; tarongo hōngōhōngōnia, ba hiza lō ta'ila he moroi ba he numalō ia. Si manō gōi niha si tumbu moroi ba Geheha Lowalangi." 9 Iofu Nikodemo imane, "Hewisa wa tola alua da'ō?" 10 Itema li Yesu, "Guru ndra'ugō ba gotalua niha Gizera'eli, hewisa wa lō ō'ila da'ō? 11 Ya faduhu dōdōu: hadia zaboto ba dōdōma da'ō ni'ombakha'ōma, ba hadia ni'ilama da'ō nifaduhu'ōma, ba lō sa'atō mitema wangombakhama. 12 Lō faduhu dōdōmi khō-Gu, na U'ombakha'ō zanandrōsa ba gulidanō andre; hewisa wa tola faduhu dōdōmi khō-Gu, na U'ombakha'ō khōmi zanandrōsa ba zorugo? 13 Samōsa lō si no mōi ba zorugo, ba hiza so zoroi zorugo si no mōi ba gulidanō, ya'ia Nono Niha nifatenge Lowalangi. 14 Hulō gulō nituwu Moze yawa ba dōla geu ba danō si mate, si manō gōi wanuwu yawa Ono Niha nifatenge Lowalangi, 15 ena'ō lasōndra wa'auri sindruhundruhu dozi samati khō-Nia." 16 Si manō wa'omasi Lowalangi nōsi gulidanō andre, irege Ifatenge nono-Nia si ha sambua, ena'ō lō tekiko dozi samati khō-Nia, lasōndra wa'auri sindruhu ba si lō aetu. 17 Tobali sangorifi ulidanō nifatenge-Nia andrō ba tenga sanguhuku ulidanō. 18 Lō Ihuku Lowalangi zamati khō nono-Nia andrō. Ba no Ihuku Lowalangi niha si lō mamati khō Nono-Nia andrō si ha sambua. 19 Da'a danedane wanguhuku andrō: No mōi ba gulidanō haga andrō, ba hiza abōlō la'omasi'ō zogōmigōmi niha moroi ba haga, bōrō me si lō sōkhi nilaura. 20 Lō la'omasi'ō haga dozi niha solau si lō sōkhi; lō omasi i'ondrasi haga, bōrō me ata'u ia na oroma nilaunia si lō sōkhi andrō. 21 Niha solau somasi Lowalangi, zangondrasi haga; ena'ō oroma wa si faudu ba zomasi Lowalangi nilaunia. 22 Aefa da'ō numalō ba danō Yudea Yesu awō ndra nifahaō-Nia. Mato ha'uga ngaluo torōi ira ba da'ō ba labayagō idanō niha. 23 Lō nasa mube'e ba gurunga Yohane me inōtō da'ō. Ibayagō idanō niha ba Gaino, lō arōu i'otarai Zalima, bōrō me oya nidanō ba da'ō. La'ondrasi ia niha, ba ibayagō idanō ira. 25 Faguagua ōsa nifahaō Yohane ba niha Yahudi sanandrōsa ba gamakhoita wangehao andrō molo'ō agama niha Yahudi. 26 La'ondrasi Yohane, lamane khōnia, "He Guru, hadia lō olifu'ō niha andrō si fao khōu yefo Nungo Nidanō Yoridano, nituturumō khōma? Mamayagō idanō gōi Ia, ba fefu niha la'ondrasi Ia!" 27 Itema li Yohane, imane, "Lō hadia ia ba niha, na tenga nibe'e Lowalangi da'ō khōnia. 28 No

mirongo niwa'ōgu, 'Tenga Razo Sangorifi nifabu'u Lowalangi andrō ndra'odo. Samokai lala ndra'o nifadaridari'ō fōna-Nia.' 29 Marafule zokhō ni'owalu andrō. Ha si mōi awō samondrongo zi fahuwu khō marafule andrō, ba no somuso tōdō ia na irongo wehede marafule andrō. Si manō gōi ndra'odo. Sindruhundruhu no somuso tōdō ndra'o. 30 Manōi wa'ebua-Nia ba lō tola lō'ō awuwu ndra'o." 31 Tōra moroi ba niha bō'ō fefu zoroi moroi yawa. Niha gulidanō zi otarai gulidanō andre, ba lahuho'ō zanandrōsa ba gulidanō. Ba tōra moroi ba niha fefu zi otarai moroi yawa andrō! 32 Iwa'ō fefu zi no Irongo ba si no I'ila, ba hiza samōsa lō si faduhu tōdō ba duria niwa'ō-Nia. 33 Si faduhu tōdō ba niwa'ō-Nia andrō zamaduhu'ō wa sindruhu Lowalangi andrō. 34 Niha nifatenge Lowalangi zolohe Turia soroi Lowalangi, bōrō khō-Nia no Ibe'e fefu Eheha Lowalangi. 35 I'omasi'ō Nono-Nia Ama, ba no Ibe'e fefu hadia ia ba danga-Nia. 36 Samati khō Nono andrō, zi falukha fa'auri sindruhu ba si lō aetu. Lō falukha wa'auri sindruhu ba si lō aetu niha si lō mamati khō Nono andrō, ba lō mamalō wōnu Lowalangi khōnia.

4:1 Ba larongo ira Farizai'o wa abōlō ato nibayagō Yesu idanō moroi khō Yohane. ( 2 Sindruhunia samalua famayagō idanō tenga Yesu, hiza i ira nifahaō-Nia.) 3 Me I'ila Yesu wa no larongo da'ō ira Farizai'o, numalō Ia ba Yudea, ba mangawuli ba Galilea. 4 Ba wofanō-Nia andrō Itōrō Zamaria. 5 Irugi zi sambua banua sotōi Sikhara Yesu ba danō Zamaria, lō arōu i'otarai danō andrō nibe'e Yakobo khō nononia Yosefo. 6 So mba'a Yakobo ba da'ō. Bōrō wa'erege dōdō Yesu wofanō, mōi Ia dumadao ba zinga mba'a andrō. Mato laluo me inōtō da'ō, 7 no numalō ndra nifahaō Yesu ba fasa mōi mowōli gō. Tohare samōsa ndra alawe Zamaria wana'u idanō. Imane khōnia Yesu, "He Ina, hadia tola U'andrō be'e ō-Gu nidanō?" 9 Ite ma li ira alawe Zamaria andrō, imane, "Niha Yahudi Ndra'ugō Ama; ba niha Zamaria ndra'odo; hana wa Ō'andrō khōgu nidanō?" (Bōrō me lō amakhaita ba lō fariawō niha Yahudi faoma niha Zamaria.) 10 Imane Yesu, "Na aboto ba dōdō mbuala Lowalangi ba na ō'ila haniha zangandrō khōu idanō, ba ya'ugō na'i zangandrō khō-Nia idanō, ba Ibe'e khōu nidanō aurifa." 11 Imane ira alawe andrō, "He Ama, lō khō-U timba, ba wa'abakha mba'a andre. Hezo moroi Ōhalō nidanō aurifa andrō? 12 Tuama Yakobo zame'e khōma ba'a andre. Moroi ba mba'a andre ihalō gōnia idanō; awō ndraononia awō gurifōnia. Hadia, abōlō ebua ndra'ugō moroi khō duama Yakobo andrō?" 13 Imane Yesu, "Ifuli owōkhi dōdō niha fefu samadu idanō andre, 14 ba samadu idanō nibe'e-Gu khōnia lō isōndra wa'owōkhi dōdō irugi zi lō aetu. Bōrō me idanō andrō nibe'e-Gu khōnia tobali umbu nidanō sangele ba same'e fa'auri sindruhu ba si lō aetu!" 15 Imane ira alawe andrō, "He Ama, be'e khōgu nidanō andrō ena'ō lō owōkhi sa'ae dōdōgu; ba lō moguna mōi ndra'o ba da'e ba wangai idanō." 16 Imane khōnia Yesu, "Ae'e kaoni wo'omou, ba fuli'ō ba da'e." 17 Ite ma li ira alawe andrō imane, "Lō hadōi fo'omogu." Imane Yesu, "Sindruhu niwa'ōu, wa lō fo'omou, 18 bōrō me no dalima ndra matua sangowalu khōu, ba ira matua si fao khōu iada'e tenga fo'omou sindruhunia. Tobali, sindruhu hadia niwa'ōmō andrō." 19 Imane ira alawe andrō, "Awena aboto ba dōdōgu wa sama'ele'ō ndra'ugō. 20 Lafosumange Lowalangi ira satuama ba hili andre, ba ya'ami niha Yehuda zanguma'ō wa ha ba Yeruzalema nahia wamosumange Lowalangi." 21 Imane Yesu khōnia, "Ya faduhu dōdōu talifusō, so ginōtō dania tenga ba hili andre lafosumange Lowalangi ba tenga gōi ba Yeruzalema. 22 Mifosumange Lowalangi si lō mi'ila ya'ami niha Zamaria, ba ma'ila nifosumangema ya'aga niha Yahudi, bōrō me so wangorifi moroi ba niha Yahudi. 23 So dania ginōtōnia, ba no irugi inōtō andrō, wa moroi ba wa'abōlō Geheha Lowalangi, dozi niha lafosumange Nama, Lowalangi satulō, si mane nidōnadōna Nama. 24 Lowalangi andrō ba no Eheha, ba ha moroi ba wa'abōlō Geheha Lowalangi tola lafosumange Nama molo'ō fetaro-Nia." 25 Imane ira alawe andrō khō Yesu, "Aboto ba dōdōgu wa tohare dania Razo Sangorifi (nifabu'u Lowalangi, nifotōi Keriso). Na tohare Ia, I'ombakha'ō khōda

fefu hadia ia." 26 Imane Yesu, "Ya'odo andre Ia si fahuhuo khōu." 27 Me inōtō da'ō mangawuli ndra nifahaō Yesu. Ahōli dōdōra me fahuhuo Yesu ba ndra alawe andrō. Samōsa lō hadōi ba gotaluara sanofu khō ndra alawe, "Hadia zomasi'ō talifusō?" ma zui lasofu khō Yesu, "Hana wa fahuhuo Ndra'ugō ba ndra alawe andre, Ama?" 28 Aefa da'ō irōi zirege nidanō khōnia ira alawe ba da'ō ba fagohi ia numalō ba mbanua ba wangombakha ba niha si so ba fasa, 29 "Mitabu, mifaigi niha sangombakha khōgu fefu hadia gamuatagu. Ba dōdōgu, te Ya'ia andrō Razo Sangorifi si no Ifabu'u Lowalangi!" 30 Larōi mbanua niha andrō numalō ira khō Yesu. 31 Gasagasa da'ō lakaoni manga Yesu ira nifahaō-Nia. Lamane, "He Guru, lau manga!" 32 Itema li Yesu, "So gō khō-Gu ba lō mi'ila hadia gō andrō." 33 Faoma lasofu khō nawōra ira nifahaō andrō, "Hadia so zolohe ō-Nia?" 34 Imane Yesu, "Folo'ō somasi zamatenge Ya'o da'ō gō-Gu, awō wangasiwai halōwō nibe'e-Nia khō-Gu. 35 Mimane wanguma'ō, 'ōfa wawa tō, awena bawa wamasi.' Ba hiza Uwa'ō khōmi: Mihaogō wamaigi nowi. No asoso ba no tola nibasi! 36 Latema mbua gōlōra samasi andrō; i'owuloi mbua wangahalō soguna ba wa'auri sindruhundruhu. Omuso dōdō zanaru ba he samasi. 37 Sindruhu gamaedola andre, 'Samōsa zananō ba samōsa zamasi.' 38 Ufatenge ami wamasi ba nowi si tenga ni'ohalōwōgōimi; no mohalōwō niha bō'ō ba da'ō, ba mitema mbua wohalōwōra." 39 Ato zowanua ba Zamaria si faduhu tōdō khō Yesu, me imane ira alawe andrō, "T'ombakha'ō khōgu hadia ia fefu zi no ufalua." 40 Ba me falukha niha Zamaria andrō khō Yesu la'andrō khō-Nia ena'ō torōi Ia khōra. Torōi Yesu ba da'ō dua ngaluo wa'ara. 41 Ba ato nasa niha si faduhu tōdō khō Yesu ba ngawalō nifahaō-Nia khōra. 42 Lamane ba ndra alawe andrō, "Faduhu dōdōma iada'e tenga ha bōrō ni'ombakha'ōu khōma, hiza bōrō me no marongo samōsa, ba aboto ba dōdōma wa sindruhu sangorifi ōsi gulidanō andre Ia." 43 Me no torōi Yesu ba mbanua Zikhara dua ngaluo, numalō Ia ba Galilea. 44 No Iwa'ō samōsa Yesu, "Lō lafosumange zama'ele'ō ba mbanuania samōsa." 45 Me Iruigi Galilea, latema'ō Ia niha sato si fao fa'omuso dōdō. Bōrō, me so Ia ba Gowasa Fasa ba Yeruzalema, ba no la'ila hadia nilau-Nia me inōtō da'ō. 46 Mangawuli Yesu ba Kana ba danō Galilea, ba nahia si no irai Ibali'ō agu nidanō. So samōsa zohalōwō ba nomo Razo. Mofōkhō nononia ba Gafana'uma. 47 Me irongo no mangawuli Yesu moroi ba Yudea numalō ba Galilea, mōi ia khō Yesu. I'andrō khō Yesu ena'ō Ifadōhō nononia andrō sarakhagō mate. 48 Isofu Yesu ba zohalōwō ba nomo Razo andrō, Imane, "Na lō ni'ilau zahōlihōli dōdō, lō faduhu dōdōu." 49 Imane sohalōwō ba nomo Razo andrō, "He So'aya alio'ō we'amōi fatua lō mate nonogu andrō." 50 Imane Yesu, "Ofanō manō, no auri nonomō andrō." Mamati niha andrō ba niwa'ō Yesu, andrō ilau mofanō. 51 Ba dalu lala wangawuli ba nomo, falukha ia zohalōwō khōnia ba lamane, "No auri nonomō!" 52 Isofu ha'uga bōzi me ibōrōtaigō dōhō nononia andrō. Lamane, "Menewi, aefa laluo (mato bōzi satu) alō wa'aukhunua." 53 Itōrō tōdō nama nono andrō wa me inōtō da'ō Imane Yesu khōnia, "No auri nonou." Ba mamati ia khō Yesu awō zi sambua omo ya'ira. 54 Da'ō zahōli dōdō si mendrua nilau Yesu ba Galilea me no tohare Ia moroi ba Yudea.

5:1 Bōrō me so Gowasa ba niha Yahudi, numalō Yesu ba Yeruzalema. 2 Ba so mbawa Yeruzalema ba zinga "Mbawa Gōli Mbiribiri". Lafotōi mbawa andrō Betesa ba li Heberai'o. So lima ngawua nose'ose ba zi fasui mbawa andrō. 3 Ato zofōkhō ba nose'ose andrō: sau'a, sakelakela, sombuyumbuyu. [Labalobaloi na mukiba nidanō ba mbawa. 4 Bōrō me itaria mōi mala'ika ba mbawa andrō ba wamakiba idanō. Haniha zofōkhō si fōfōna mōi ba mbawa, dōhō wōkhōnia, gofu hadia ia wōkhō andrō.] 5 Ba da'ō so zofōkhō si no tōlu ngafulu a walu fakhe wa'ara. 6 I'ila Yesu no tolea niha andrō ba da'ō, ba aboto ba dōdō-Nia wa no ara sibai wōkhōnia; andrō Imane khōnia Yesu, "Hadia omasi'ō dōhō wōkhōu?" 7 Itema li sofōkhō andrō imane, "He Ama, lō khōgu niha solohe ya'o ba mbawa na inōtō mukiba, no lahulō ndra'o niha bō'ō we'amōi bakha ba mbawa." 8

Imane Yesu khōnia, "Faoso, fazawa gasomō ba owaōwaō." 9 I'anema'ō dōhō niha andrō. Ifazawa gasonia ba mowaōwaō ia. Alua da'ō me luu Sabato. 10 Lamane ira salawa niha Yahudi ba niha andrō sawena dōhō, "Luu Sabato ma'ōkhō. Tebai ōfazawa gasou bōrō me lō faudu ba gamakhoita agama." 11 Iteba li niha andrō imane, "Samadōhō ya'odo andrō mege zango'ou ya'o imane, 'Fazawa gasomō ba owaōwaō.'" 12 Lamane wanofu, "Haniha zango'ou ya'ugō wamazawa kasomō awō wowaōwaō?" 13 Ba hiza lō i'ila haniha da'ō niha sawena dōhō andrō. Bōrō me ato niha ba da'ō ba no Ifasoli Ia Yesu ba gotalua niha sondrōi nahia andrō. 14 Falukha Yesu ba niha andrō bakha ba Nomo Zo'aya. Imane khōnia Yesu, "Iada'e no dōhō ndra'ugō; angenanō fa bōi ōfazōkhi horō sa'ae. Bōrō na ōlau horō gōna ndra'ugō sabōlō afōkhō moroi andre." 15 Mangawuli niha andrō ba i'ombakha'ō khō ndra salawa niha Yahudi wa Yesu zamadōhō ya'ia. 16 Bōrō da'ō ibōrōtaigō la'alui lala ira salawa niha Yehuda ba wamunu Yesu, me no Ifadōhō niha ba luu Sabato. 17 Ba hiza Imane khōra Yesu, "Lō mo'aetufa mohalōwō nama-Gu; ba Ya'o ba mohalōwō gōi." 18 Bōrō wehede Yesu andrō wa la'alui lala nasa ira salawa niha Yahudi ba wamunu Ya'ia. Lalau zi manō tenga ha bōrō me Ifadōhō niha ba luu Sabato; no bōrō gōi me Imane Ama-Nia Lowalangi; hulō na Ifagōlōgōlō Ia khō Lowalangi. 19 Imane wanguma'ō Yesu ba niha andrō, "Mihaogō wanōngōni: Tebai Ilau zomasi Ia Ono andrō. Ilau hadia ni'ila-Nia Ilau Ama-Nia. Bōrō me hadia nilau Nama da'ō gōi nilau Nono andrō. 20 I'omasi'ō sibai Nono-Nia Ama andrō. I'ombakha'ō khō Nono-Nia fefu halōwō-Nia. Mendrua manō I'oroma'ō khō Nono-Nia halōwō sabōlō ebua ena'ō ahōlihōli fefu dōdōmi. 21 Isusugi zi no mate Ama, ba Ibe'e khōra wa'auri sindruhu ba si lō aetu; si manō gōi Nono, I'amualagō wa'auri si lō aetu ba zomasi fa'auri. 22 Lō Ihuku niha Ama. Bōrō me no Ibe'e kuaso ba danga Nono-Nia ba wangetu'ō huku. 23 Ilau fefu da'ō Ama ena'ō lafosumange Nono si mane famosumange Ama. 24 Sindruhu niwa'ō-Gu khōmi: Isōndra wa'auri sindruhu niha sanōngōni fehede-Gu ba mamati Ia ba zamatenge Ya'o. Lō tehuku ia; aefa ia moroi ba wa'amate ba isōndra wa'auri. 25 Ya faduhu dōdōmi: So ginōtō dania -- ba no irugi inōtō andrō -- larongo li Nono Lowalangi niha si no mate. Ba samondrongo fehede Nono andrō zauri. 26 Ibe'e wa'auri ba niha fefu Ama andrō; si manō gōi wa no Ibalī'ō umbu wa'auri Nononia andrō Ama same'e fa'auri ba niha fefu ba gulidanō! 27 No Ibe'e kuaso khō Nono andrō ba wangetu'ō huku, bōrō me Ono Niha Ia. 28 Bōi tokea ami wamondrongo da'e bōrō me so ginōtōnia dania larongo wehede-Nia niha si no mate bakha ba lewatō. 29 Larōi lewatō andrō. Ba fefu niha solau si sōkhi tefaoso ira ena'ō auri. Ba fefu zolau si lō sōkhi tefaoso ena'ō tehuku." 30 "Lō U'ila Ufalua hadia ia na ha moroi ba zomasi Ndra'o. U'etu'ō huku molo'ō ni'oroī'ō Lowalangi khō-Gu. Bōrō da'ō atulō gangetula-Gu, bōrō me lō U'odaligō zomasi dōdō-Gu. U'o'ō zomasi Nama samatenge Ya'o. 31 Na Ya'odo samōsa zame'e famaduhu'ō sanandrōsa khō-Gu, lō latema wamaduhu'ō-Gu andrō. 32 Ba so niha bō'ō samaduhu'ō Ya'o, ba U'ila wa sindruhu wamaduhu'ōnia andrō. 33 No mifatenge niha khō Yohane ba no ibe'e Yohane wamaduhu'ō sindruhu sanandrōsa khō-Gu. 34 U'ombakha'ō da'ō fefu, tenga bōrō wa moguna khō-Gu wamaduhu'ō niha, ha ena'ō te'orifi ami. 35 Hulō wandru si holahola ba sohaga Yohane. Ba zi lō ara sibai isului ami ba omasi ami da'ō. 36 Ba so khō-Gu wamaduhu'ō sabōlō ebua moroi ba wamaduhu'ō Yohane. U'ohalōwōgōi halōwō nibe'e Nama khō-Gu -- ya'ia halōwō nihalō-Gu iada'e -- da'ō zamaduhu'ō wa nifatenge Nama ndra'o. 37 Ba Ama si no mamatenge Ya'o andrō zamaduhu'ō Ya'o. Lō irai mirongo wehede Nama andrō, ba lō irai mi'ila zikhala-Nia. 38 Lō ba dōdōmi wehede-Nia, bōrō me lō faduhu dōdōmi ba Niha nifatenge-Nia. 39 Mi'alu'alui ba Mbuku Ni'amoni'ō, bōrō me miwalinga so khōmi ba da'ō wa'auri si lō aetu ba wangalui ba zura andrō. No Ifaduhu'ō Ndra'o Buku Ni'amoni'ō andrō! 40 Ba hiza, lō mi'ondrasi Ndra'o ba wanōndra fa'auri sindruhu ba si lō aetu. 41 Lō U'alui zumange nibe'e niha. 42 Aboto ba dōdō-Gu ami. Lō ba dōdōmi fangomasi'ō Lowalangi. 43 So Ndra'o awō wa'abōlō moroi khō Namagu, ba lō mitema Ndra'o. Ba

na niha bõ'õ zi so ba wa'abõlõnia samõsa, mitema ia. 44 Tebai faduhu dõdõmi, bõrõ me sangalui sumange niha ami, ba lõ mi'alui zumange nibe'e Lowalangi andrõ si ha sambua. 45 Bõi miwalinga U'angadugõ ami khõ Nama-Gu. Moze zangadugõ ya'ami dania -- bõrõ me Moze nitõtõnami ba da'õ. 46 Na sindruhundruhu faduhu dõdõmi khõ Moze, tatu faduhu dõdõmi khõ-Gu gõi, bõrõ me no ifaduhu'õ ndra'o Moze ba zurania. 47 Ba hiza, na lõ faduhu dõdõmi ba nisura Moze, hewisa wa faduhu dõdõmi ba niwa'õ-Gu?"

6:11 Me no aefa da'õ mangawuli Yesu yefo Mbawa Galilea (nifotõi gõi Bawa Diberia). 2 Ato niha solo'õ Ya'ia bõrõ me no la'ila nilau-Nia ba wamadõhõ niha sofõkhõ. 3 Numalõ yawa ba hili Yesu, dumadao Ia ba da'õ awõ ndra nifahaõ-Nia. 4 Me inõtõ da'õ no ahatõ Gowasa Fasa ba niha Yahudi. 5 Me Ifakhõlõ ia Yesu I'ila ato niha sangondrasi Ya'ia. Andrõ Imane khõ Wilifo, "Hezo tola ta'õli gõ ena'õ tola manga ndra niha andre fefu?" ( 6 Imanõ wehede Yesu bõrõ me omasi Ia itandraigõ Wilifo; bano I'ila samõsa hadia nifalua-Nia.) 7 Imane Filifo, "Ambõ zi dua ngaotu ribu rufia fowõli õ niha sato andre, hewa'ae ha ma'ifu ero samõsa." 8 Imane Andrea, talifusõ Zimoni Fetero, samõsa ba gotalua ndra nifahaõ Yesu, 9 "So ndraono ba da'e si so lima ngawua roti ba dua gi'a. Ba hadia gunania da'õ ba niha sato andre?" 10 Imane Yesu khõ ndra nifahaõ-Nia, "Mifedadao niha sato andrõ." Ba nahia andrõ oya ndru'u, ba dumadao ira yawa ba dete ndru'u fa'ato fefu mato lima ribu ndra matua. 11 Aefa da'õ Ihalõ roti Yesu, I'aohasi gõlõ Lowalangi. Aefa da'õ Ibagibagi roti andrõ ba niha sato si so ba da'õ. Si manõ gõi Ilau ba gi'a andrõ. Manga niha sato fefu irege abuso. 12 Me no abuso ira wemanga, Imane Yesu khõ ndra nifahaõ-Nia, "Mi'owuloi zi torõi gõ andrõ, bõi so zi tetibo." 13 So felendrua ragaraga afõnu tõ zi tõra gõ niha sato soroi roti si lima ngawua andrõ, me no la'owuloi ira nifahaõ-Nia. 14 Me la'ila niha sato zahõli dõdõ andrõ nilau Yesu, lamane, "Sindruhundruhu, Sama'ele'õ niha andrõ, si tohare dania ba gulidanõ!" 15 Aefa da'õ lafaso Yesu we'amõi Razona. I'ila Yesu gera'era dõdõra andrõ, bõrõ da'õ numalõ Ia ba hili ba zi lõ nihaniha. 16 Me no ibõrõtaigõ bongi, numalõ ba mbawa ndra nifahaõ Yesu. 17 Mõi ira yawa ba dundraha ba wangõtõ bawa numalõ ba Gafana'uma. Me no irugi bongi, lõ si mõi nasa khõra Yesu. 18 Gasagasa da'õ, so nangi sabõlõbõlõ ba mobade mbawa. 19 No moloyo ndra nifahaõ Yesu mato õfa irugi lima kilomete; i'anema'õ la'ila Yesu mowaõwaõ ba dete nidanõ wangondrasi tundraha. Ata'u sibai ira. 20 Imane khõra Yesu, "Bõi mi'ata'ufi, Ya'odo da'e!" 21 Latema'õ Ia yawa ba dundraha, ba hiza, ba ginõtõ da'õ gõi larugi zawatõra. 22 Mahemolu õ, la'ila niha sato si so yefo mbawa wa ha sara dundraha mege ba da'õ. La'ila wa no ofõna ladaridari ira nifahaõ Yesu, ba lõ si fao Yesu khõ ndra nifahaõ-Nia andrõ. 23 Tohare dundraha tanõ bõ'õ moroi ba Diberia ba manao ira ba nahia wemanga niha sato roti me no aefa I'aohasi gõlõ Lowalangi Yesu. 24 Me la'ila niha sato lõ Yesu awõ nifahaõ-Nia ba da'õ, ba mõi ira yawa ba dundraha, numalõ ira ba Gafana'uma ba wanalui Yesu. 25 Me falukha niha sato andrõ khõ Yesu yefo mbawa, lasofu khõ-Nia lamane, "He Guru, hamega Ōrugi da'e?" 26 Itema li Yesu Imane, "Sindruhundruhu niwa'õ-Gu khõmi: Mi'alui ndra'o tenga bõrõ wa no aboto ba dõdõmi zahõlihõli dõdõ nilau-Gu, ha bõrõ me no abuso ami roti. 27 Bõi mi'eregesi tõdõ wanalui õ si tola ahoi ba obou. Mi'ohalõwõ wanalui õ si lõ obou ba same'e fa'auri si ndruhu. Ibe'e khõmi dania gõ andrõ Ono Niha nifatenge Lowalangi; bõrõ me no Ibe'e khõ-Nia wa'abõlõ Ama Lowalangi andrõ." 28 Aefa da'õ lasofu khõ-Nia, "Hadia nilauma ena'õ tola mababaya halõwõ Lowalangi?" 29 Itema li Yesu, "Da'e zomasi Lowalangi milau khõ-Nia: Mi'amati khõ-Nia nifatenge Lowalangi andrõ." 30 Lamane, "Na si manõ, hadia so zahõlihõli dõdõ nilau Guru khõma ena'õ ma'ila ba faduhu dõdõma khõ-U? Tandraigõ foroma'õ hadia zi tola Ōfalua! 31 La'a mana ira tuama ba danõ si mate. No tesura ba Mbuku Ni'amoni'õ, 'Ibe'e õra roti moroi si yawa ba zorugo.' " 32 Imane khõra Yesu, "Sindruhu niwa'õ-Gu khõmi: Tenga roti soroi zorugo nibe'e

Moze andrō; roti nibe'e Namagu khōmi da'ō zindruhunია roti soroi zorugo. 33 Bōrō me roti nibe'e Lowalangi, Ya'ia zi mōi tou moroi ba zorugo ba same'e fa'auri sindruhu ba si lō aetu ba gulidanō andre." 34 Lamane, "He Ama, bōi bulō'ō wame'e ōma roti andrō." 35 Imane khōra Yesu, "Ya'odo roti fangorifi andrō. Si mōi khō-Gu lō isōndra olofo. Ba si faduhu tōdō khō-Gu lō sa'ae dania owōkhi dōdō. 36 No Uwa'ō khōmi wa no mi'ila Ndra'o, ba lō manō faduhu dōdōmi. 37 Fefu niha nibe'e Nama khō-Gu la'ondrasi Ndra'o. Lō Utimba niha si mōi khō-Gu. 38 Mōi Ndra'o tou moroi ba zorugo, wamalua somasi Ia samatenge Ya'o, tenga somasi Ndra'o samōsa. 39 Da'e zomasi zamatenge Ya'odo andrō: ena'ō samōsa bōi taya niha nibe'e-Nia khō-Gu; ena'ō U'orifi ira mangawuli ba luo safuria. 40 Bōrō me da'e zomasi Namagu: Fefu niha si no mangila Ono andrō ba si faduhu tōdō khō-Nia, lasōndra wa'auri sindruhu ba si lō aetu, ba U'orifi ira mangawuli ba Ngaluo Safuria." 41 Ibōrōtaigō mukōkōkōkō niha Yahudi khō Yesu bōrō me Imane: "Roti soroi zorugo Ndra'odo andre." 42 Lamane, "Hadia tenga Yesu niha andre, ono Yosefo? Ma'ila nama awō nina-Nia! Hewisa wa Imane moroi ba zorugo tohare Ia?" 43 Imane khōra Yesu, "Bōi mi'okōkōkōkō. 44 Samōsa lō si mōi khō-Gu niha na tenga Ama, samatenge Ya'odo andrō zamatenge ya'ira khō-Gu; ba U'orifi ira dania ba Luo Safuria. 45 No tesura ba zura ndra Sama'ele'ō si mane: 'Ifahaō fefu niha Lowalangi.' Tobali fefu niha samondrongo fehede Nama andrō ba si mōi nifahaō-Nia, da'ō zi mōi mangondrasi Ya'odo. 46 Ba tenga da'ō geluaha wa so niha si no mangila Ama. Ha Ya'ia andrō si otarai Lowalangi zangila Ama andrō. 47 Mitōngōni: Si faduhu tōdō khō-Gu zanōndra fa'auri sindruhu ba si lō aetu dania. 48 Ya'odo roti same'e fa'auri. 49 La'a mana ira tuami, ba danō si mate, ba hiza mate ira sa'atō. 50 Fabō'ō sibai roti soroi zorugo andrō; si manga roti andrō lō mate dania. 51 Ya'odo roti soroi zorugo -- roti same'e fa'auri. Si manga roti andrō auri irugi zi lō aetu. Botogu roti andrō nibe'e-Gu. Ululu mboto-Gu, ena'ō te'orifi gulidanō." 52 Fehede Yesu andrō zamobōrō faguaguasa ba gotalua ndra niha Yahudi. Lamane, "Hewisa Ibe'e ni'ada mboto-Nia niha andre?" 53 Imane khōra Yesu, "Mihaogō wanōngōni: Lō misōndra wa'auri ba khōmi na lō mi'a mboto Nono Niha nifatenge Lowalangi andrō ba na lō mibadu ndro-Nia. 54 Si manga boto-Gu ba samadu do-Gu, zanōndra fa'auri sindruhu ba si lō aetu. Da'ō ni'orifi-Gu na Luo Safuria. 55 Bōrō me boto-Gu andre gō sindruhu ba do-Gu zindruhu nibadu. 56 Niha si manga boto-Gu ba samadu do-Gu, ahatō ia khō-Gu ba ahatō Ndra'o khōnia. 57 Ama sauri andrō zamatenge Ya'o ba auri Ndra'o khō-Nia. Si manō gōi niha si manga boto-Gu, auri ia moroi khō-Gu. 58 Da'e roti andre soroi zorugo: lō fagōlō roti andre si mane ni'a ndra tuami. Hewa'ae no la'a roti andrō, mate sa'atō ira. Ba si manga roti andre auri irugi zi lō aetu." 59 Iwa'ō da'ō fefu Yesu, me mamahaō Ia ba gosali ba Gafana'uma. 60 Ato ndra nifahaō Yesu samondrongo fehede Yesu andrō. Lamane, "Abe'e sibai wamahaō andre. Hezo wa tola latema niha!" 61 Hewa'ae samōsa lō sangombakha, I'ila Yesu wa mukōkōkōkō ndra nifahaō bōrō da'ō. Andrō wa Imane khōra, "Hadia, lō omasi ami wamahaō andre? 62 Hewisa dania na mi'ila mangawuli ba nahia-Nia mbōrōta Nono Niha nifatenge Lowalangi andrō? 63 Eheha Lowalangi zombali'ō auri niha. Lō guna wa'abōlō niha. Fehede andrō niwa'ō-Gu no fehede Geheha Lowalangi ba fehede same'e fa'auri. 64 Ba hiza, so gōi ba gotaluami zi lō faduhu tōdō." (No I'ila ba wamōbōrō Yesu haniha zi lō omasi faduhu tōdō ba haniha zi manga mbōli-Nia.) 65 Imane nasa Yesu, "Da'ō mbōrō wa U'ombakha'ō khōmi wa samōsa lō si mōi khō-Gu natenga Ama andrō zame'e fa'abōlō khōnia we'amōi khō-Gu." 66 I'otarai da'ō ato zondrōi Ya'ia si faofao khō-Nia mege, lō omasi ira sa'ae wolo'ō Ya'ia. 67 Isofu Yesu khō ndra nifahaō-Nia si felendrua, "Hadia lō'ō gōi omasi ami mirōi Ndra'o?" 68 Imane Simoni Fetero khō-Nia, "He So'aya, ha'ōkhō mōi ndra'aga? Ha fehede Zo'aya zame'e fa'auri sindruhu ba si lō aetu. 69 Na faduhu dōdōma ba mamatiga wa Ya'ugō Zo'aya dengetenge ni'amoni'ō andrō soroi Lowalangi." 70 Itema lira Yesu Imane, "Hadia tenga Ya'odo zangobini ya'ami si felendrua andre? Ba hiza, samōsa ba gotaluami gafōkha!" 71 Niwa'ō



Yesu andrō ya'ia Yuda ono Zimoni banua Gariota. Bōrō me hewa'ae samōsa moroi ba gotalua ndra nifahaō Yesu Yuda, ba hiza omasi ia tobali si manga mbōli Yesu.

7:1 Me no aefa da'ō Idōrōdōrōi Galilea Yesu. Lō omasi Ia numalō ba danō Yudea bōrō me edōna labunu Ia ira salawa niha Yahudi. 2 Me luo da'ō no ahatō Gowasa Nose Mbulu Geu ba niha Yehuda. 3 Lamane khō Yesu ira talifusō-Nia, "Rōi nahia andre ae'e ba Yudea, ena'ō la'ila halōwō-U ira nifahaō-Mō. 4 Lō samini'ō nilaunia, na omasi ia teturia. Na Ōlau halōwō si mane da'ō, ba lō tola lō'ō la'ila ba zi sagōrō ulidanō!" ( 5 Bōrō me lō faduhu gōi dōdō ndra talifusō-Nia khō-Nia.) 6 Imane khōra Yesu, "Lō inōtō khō-Gu, ba hiza, ba khōmi ba tola manō gofu hawa'ara. 7 Lō la'afōkhōi tōdō ami niha gulidanō andre. Ba hiza lafōkhōi tōdō Ndra'o me lō aetu Uwa'ō ba gulidanō andre wa si lō sōkhi nilaunia. 8 Mi'ae'e manō ba Gowasa andrō. Lō mōi Ndra'o bōrō tenga inōtō khō-Gu." 9 Si manō niwa'ō Yesu khō ndra talifusō-Nia, ba torōi Ia ba Galilea. 10 Me no numalō ndra talifusō-Nia ba Gowasa andrō, mōi Yesu ha Ya'ia samōsa lō sangila. 11 La'alui Yesu ira salawa niha Yahudi ba Gowasa andrō ba lasofu lamane, "Heza so Ia?" 12 Faoma fangōngōngōngō niha sato sanandrōsa khō-Nia. So zanguma'ō Niha si sōkhi Ia andrō: "So gōi zanguma'ō. Lō'ō! Samaelungu Ia!" 13 Samōsa lō si lō ata'u wamatunō sanandrōsa khō-Nia fōna niha bōrō me ata'u ira ndra salawa niha Yahudi. 14 Ba dalu Gowasa, mōi Yesu bakha ba Nomo Zo'aya, Ibōrōtaigō mamahaō. 15 Ahōli dōdō ndra salawa niha Yahudi. Lamane, "Hewisa wa I'ila zoya ngawalō niha andre, hewa'ae lō irai sekola Ia?" 16 Itema li Yesu Imane, "Tenga moroi khō-Gu hadia ia nifahaō-Gu, no famahaō Lowalangi samatenge Ya'o. 17 Niha samalua somasi Lowalangi, da'ō zangila wa famahaō-Gu andre moroi khō Lowalangi, tenga somasi dōdō-Gu manō. 18 Niha sanguma'ō somasi dōdōnia, omasi nifosumange niha andrō. Ba hiza sangalui sumange khō zamatenge ya'ia, da'ō niha satulō tōdō: lō falimoso ba niha si manō. 19 Hadia, tenga Moze zame'e oroisa Lowalangi khōmi? Samōsa lō ba gotaluami solo'ō. Hana wa omasi ami mibunu Ndra'odo?" 20 Latema li-Nia niha sato, lamane, "Te owōhō'ō! Haniha zomasi mamunu Ya'ugō?" 21 Itema li Yesu imane, "Ha sambalō halōwō nihalō-Gu, ba ahōli dōdōmi. 22 No ibe'e gorōisa khōmi Moze ba miboto ndraonomi. Bōrō da'ō miboto niha, hewa'ae ba luo Sabato. Sindruhunia tenga Moze zi fōfōna mamoto niha, no ira tuada sauri fatua lō Moze. 23 Na miboto niha ba luo Sabato ena'ō lō misawō gorōisa Moze, hana wa mofōnu ami khō-Gu na Ufadōhō niha ba luo Sabato? 24 Bōi mihuku niha ha ba zoroma ba hōrō, mihuku niha ba wa'atulō ba ba wa'aduhu." 25 So ōsa niha Yeruzalema sanguma'ō, "Hadia, tenga da'e niha ni'alu'alui andrō ena'ō labunu? 26 Mifaigi! Fahuhuo Ia fōna niha sato ba samōsa lō sanegu Ya'ia! Hadia, no aboto ba dōdō ndra salawada wa Ya'ia Razo Sangorifi andrō nifabu'u Lowalangi? 27 Na tohare Razo Sangorifi andrō nifabu'u Lowalangi, samōsa lō sangila hezo moroi Ia! Ba hiza, ta'ila hezo moroi niha andre." 28 Me mamahaō Yesu bakha ba Nomo Zo'aya, Isofu Yesu ebua li-Nia, "Hadia sindruhundruhu mi'ila haniha Ndra'odo andre ba hezo moroi Ndra'o? Tenga ba zomasi dōdō-Gu so Ndra'o. Sindruhu zamatenge Ya'odo andrō, ba lō mi'ila Ia. 29 U'ila Ia, bōrō me moroi khō-Nia Ndra'odo ba Ya'ia zamatenge Ya'o." 30 Omasi sibai niha sato andrō wondra'u Yesu, ba hiza samōsa lō sambambaya Ya'ia bōrō me tenga nasa inōtō-Nia. 31 Baero da'ō, ato gōi ba gotalua niha sato si faduhu tōdō khō-Nia, lamane, "Na tohare Razo Sangorifi nifabu'u Lowalangi andrō, hadia abōlō oya ilau zahōli dōdō moroi ba nilau niha andre?" 32 Larongo ira Farizai'o wangōngōsa niha sato sanandrōsa khō Yesu. Bōrō da'ō, si fao ira ere sebua lafatenge zanaro ba Nomo Zo'aya ba wondra'u Yesu. 33 Imane Yesu, "Ba zi lō arara fao Ndra'o khōmi. Aefa da'ō mangawuli Ndra'o khō zamatenge Ya'o. 34 Mi'alui dania Ndra'odo, ba lō misōndra; bōrō me tebai mōi ami ba zi so Ya'o." 35 Faoma lamane khō nawōra ira salawa niha Yahudi andrō, "Heza numalō niha andre, irege tebai tasōndra Ia? Hadia numalō Ia ba niha Yahudi

si so ba danō sarōu ba gotalua niha Yunani, ba mamahaō Ia khō ndra niha Yunani andrō? 36 Hadia geluaha wa Imane, 'Mi'alui dania Ndra'o ba lō misōndra, ba tebai mōi ami ba nahia si so Ya'o.' " 37 Ngaluo sebua, ngaluo ba gafuriata ba gowasa andrō. Me luō da'ō muzizio Yesu ba mu'ao Ia ebua li-Nia Imane, "Ya mōi khō-Gu zowōkhi tōdō ba wamadu idanō. 38 No tesura bakha ba Mbuku Ni'amoni'ō si mane da'e: 'Moroi ba dōdō niha samati khō-Gu, mangumbu nidanō aurifa.' " ( 39 Eheha Lowalangi niwa'ō Yesu, nibe'e-Nia dania ba zamati khō-Nia. Bōrō me inōtō da'ō lō nasa mube'e; bōrō me lō nasa mufolakhōmi Yesu.) 40 Ato niha samondrongo niwa'ō Yesu. Ba so ba gotaluara zanguma'ō, "Lō tola lō'ō sama'ele'ō niha andre!" 41 So danō bō'ō zanguma'ō, "Razo Sangorifi nifabu'u Lowalangi Ia andre!" Ba so zanguma'ō, "Ae, hewisa wa moroi ba Galilea tohare Razo Sangorifi? 42 Bakha ba Mbuku Ni'amoni'ō no tesura wa Razo Sangorifi andrō tohare dania ba nga'ōtō Dawido ba tumbu ba Mbetilekhema, banua Dawido." 43 Ibōrōtaigō fakara niha sato andrō sanandrōsa khō Yesu. 44 So zomasi mondra'u Ya'ia, ba hiza samōsa lō sombambaya Ya'ia. 45 Mangawuli ndra sanaro ba Nomo Zo'aya nifatenge ndra ere sebua awō ndra Farizai'o ba wondra'u Yesu. Lamane ira ere sebua awō ndra Farizai'o khō ndra sanaro andrō, "Hana wa lō mi'ohe Ia ba da'e?" 46 Lamane ira sanaro andrō, "Lō irai so niha si fahuhuo si mane da'ō!" 47 Lamane ira Farizai'o, "E, hadia no gōna ami famaelungu-Nia gōi?" 48 "Hadia so ba gotalua ndra salawa niha Yehuda awō ndra Farizai'o zi faduhu tōdō khō-Nia? 49 Ba hiza niha sato andre, lō aboto ba dōdōra huku Moze, ba hewa'ae si manō ba si falukha fangelifi ira." 50 Ba gotalua ndra Farizai'o so zi no irai mōi khō Yesu me bongi; Nikodemo dōi niha andrō. Imane Nikodemo khō ndra Farizai'o tanō bō'ō andrō, 51 "Molo'ō huku agama khōda, tebai tehuku zi samōsa niha fatua lō tarongo golalōwania, ba fatua lō tafareso hadia zi no ifalua." 52 Latema li lamane, "E, hadia moroi ba Galilea ndra'ugō?" Fareso Mbuku Ni'amoni'ō: "Lō hadōi sama'ele'ō moroi ba Galilea!" [ 53 Aefa da'ō, mangawuli fefu niha ba nomora.

8:1 Ba hiza numalō Yesu ba Hili Zaitu. 2 Mahemolu da'ō ba zahulō wongi mōi Ia ba Nomo Zo'aya, ba ato niha sangondrasi Ya'ia. Mudadao niha sato andrō, ba mamahaō Yesu khōra. 3 Gasagasa da'ō, tohare ndra Samahaō ba Agama awō ndra Farizai'o, la'ohe khō-Nia samōsa ndra alawe sohorō. Lafezizio ndra alawe andrō ba gotalua, 4 aefa da'ō lamane khō Yesu, "He Ama guru, no masōndra wohorō ndra alawe andre. 5 Ba Huku Moze sanandrōsa ba goroisa Lowalangi, no ibe'e gamakhoita Moze ena'ō ira alawe si mane da'ō nitebu kara irege mate. Hewisa gera'era-U ba zi mane Ama?" 6 Lamanō wanofu ba wamesu li-Nia, ena'ō lasōndra golalōwa-Nia. Ba hiza, no Ifatugu manō Ia Yesu, ba Isura faoma turu-Nia tou danō. 7 Ba me lahōtōi wanofu, Ifaōga hōgō-Nia ba Imane khōra, "Haniha ba gotaluami zi lō olalōwa, akha i'ofōnai'ō ia wanebu ira alawe faoma kara." 8 Ifuli Ifatugu Ia Yesu ba Isura tou danō. 9 Me larongo niwa'ō Yesu andrō, Ibōrōtaigō lazarazara wondrōi nahia andrō, i'otarai zatua. Ba gafuriata ha tō Yesu zi so ba da'ō awō ndra alawe andrō si zizio ba da'ō. 10 Muzizio Yesu ba Imane ba ndra alawe andrō, "Heza so fefu ira? Hadia lō sanguhuku ya'ugō?" 11 Imane, "Lō'ō Ama." Imane Yesu, "Lau, Ya'odo gōi ba lō Uhuku ndra'ugō. Ofanō iada'e, ba bōi lau horō sa'ae." 12 Fahuhuo zui khōra Yesu. Imane Yesu, "Ya'odo haga gulidanō. Dozi solo'ō Ya'o ba lō mowaōwaō ba zogōmigōmi, me la'okhōgō haga wa'auri." 13 Lamane khō-Nia ira Farizai'o, "Ōfaduhu'ō samōsa Ndra'ugō iada'e, Ama. Lō atulō wamaduhu'ō-Mō andrō!" 14 Itema li Yesu Imane, "Hewa'ae Ube'e wamaduhu'ō sanandrōsa khō-Gu samōsa, ba hiza sindruhu wamaduhu'ō-Gu andrō; bōrō me U'ila heza moroi Ndra'o ba heza numalō-Do Lō mi'ila hezo moroi Ndra'o ba heza numalō Ndra'o. 15 Mihuku niha molo'ō fa'aniha, ba hiza samōsa lō nihuku-Gu niha. 16 Ba na Uhuku niha, atulō wanguhuku-Gu andrō, bōrō me tenga ha Ya'odo; fao khō-Gu Nama andrō samatenge Ya'o. 17 No tesura bakha ba huku agama khōmi; famaduhu'ō zi darua niha zindruhu. 18

Darua zamaduhu'ō Ya'o -- Ya'o samōsa ba Ama andrō samatenge Ya'o." 19 Lamane, "Hezo Nama-Mō andrō?" Itema li Yesu, "Lō mi'ila Ndra'odo. Ba lō'ō gōi mi'ila Nama-Gu. Na mi'ila Ndra'o, mi'ila gōi Nama-Gu." 20 Iwa'ō fefu da'ō Yesu me mamahaō Ia ba Nomo Zo'aya ahatō ba nahia weti game'ela khō Lowalangi. Ba samōsa lō sondra'u Ya'ia, bōrō me lō irugi na inōtō-Nia. 21 Ifuli Imane Yesu khōra, "Mofanō Ndra'o, ba mi'alui Ndra'o dania, ba hiza mate ami dania ba horōmi. Tebai mōi ami ba zi mōi Ndra'o." 22 Lamane ira salawa niha Yahudi, "Te Ibunu Ia, bōrō me imane, 'Ba zi mōi ndra'o, tebai mōi ami.' " 23 Imane khōra Yesu, "Moroi tou so ami; ba moroi yawa so Ndra'o. Moroi ba gulidanō ami; ba hiza Ya'o tenga moroi ba gulidanō. 24 Da'ō mbōrō wa Umane khōmi mate dania ami ba horōmi. Ba sindruhu dania mate ami ba horōmi, na lō faduhu dōdōmi wa 'Ya'odo andre Ia nifotōi YA'ODO SI SO'." 25 Lasofu lamane, "Haniha zindruhunia Ndra'ugō andre?" Itema li Yesu Imane, "Hadia guna fahuhuo Ndra'o khōmi! 26 Oya zomasi Ndra'o Uwa'ō khōmi ba wangotu'ō. Ba hiza U'ombakha'ō ba gulidanō hadia nirongo-Gu khō zamatenge Ya'o -- bōrō me satulō Ia." 27 Lō aboto ba dōdōra wa fahuhuo Ia sanandrōsa khō Nama. 28 Bōrō da'ō Imane Yesu khōra, "Dania na no miforōfa Nono Niha andrō nifatenge Lowalangi, awena aboto ba dōdōmi wa 'Ya'odo, nifotōi YA'O SI SO andrō', ba ginōtō da'ō mi'ila wa lō hadōi nilau-Gu ba zomasi Ndra'o manō. Nifahaō Nama andrō khō-Gu niwa'ō-Gu. 29 Ba samatenge Ya'odo andrō ba faofao Ia khō-Gu. Lō irai Irōi Ndra'o bōrō me somasi Ia nilau-Gu." 30 Me no aefa Iwa'ō da'ō Yesu, ato niha si faduhu tōdō khō-Nia. 31 Aefa da'ō Imane Yesu ba niha Yahudi si faduhu tōdō khō-Nia, "Na lō farōi ami ba wamahaō-Gu, ba sindruhundruhu nifahaō-Gu ami, 32 ba awena aboto ba dōdōmi Lowalangi sindruhu andrō, ba wa falukha ami wangepa." 33 Lamane, "Nga'ōtō Gaberahamo ndra'aga. Lō irai mōi ndra'aga sawuyu niha! Hadia gohitō dōdō-U wa Ōmane, 'Te'efa'ō dania ami?'" 34 Imane khōra Yesu, "Mitōngōni, fefu niha samazōkhi horō no sawuyu horō. 35 Tenga si ogōtō'ō yomo ba nomo zawuyu; ha sindruhu nono zangahono yomo ba nomo. 36 Na I'efa'ō ami Ono andrō awena sindruhundruhu aefa. 37 Aboto ba dōdō-Gu wa nga'ōtō Gaberahamo ami. Ba hiza, omasi ami mibunu Ndra'o bōrō me lō omasi mitema wamahaō-Gu. 38 Uwa'ō hadia ni'oroma'ō Nama khō-Gu; ba milau hadia ni'o'ou namami khōmi." 39 Lamane wanema li, "Aberahamo namama." Imane Yesu, "Na sindruhu ono Gaberahamo ami, ba mifalua hadia nilau Gaberahamo. 40 Sindruhu andrō nirongo-Gu khō Lowalangi U'ombakha'ō khōmi, ba hiza mibunu na'i Ndra'o. Lō ilau zi manō Aberahamo! 41 Milau hadia ia nilau namami andrō." Latema li ira niha Yahudi, "Tenga ono horō ndra'aga. Ha samōsa namama ya'ia Lowalangi." 42 Aefa da'ō Imane khōra Yesu, "Na sindruhu Amami Lowalangi andrō, mi'omasi'ō Ndra'o, bōrō me sindruhu moroi khō Lowalangi Ndra'odo. Tenga ba zomasi dōdō-Gu so Ndra'o. Ya'ia zamatenge Ya'o. 43 Hana wa lō aboto ba dōdōmi niwa'ō-Gu? Bōrō me lō omasi ami mifondrondrongo wamahaō-Gu. 44 Ono namami ami, ya'ia Gafōkha andrō. Andrō wa mi'o'ō zomasi namami. No i'otarai mbōrōta, samunu niha Gafōkha andrō. Tenga si fao khō Lowalangi ia, bōrō me lō si sōkhi ba dōdōnia. Si falimo Gafōkha bōrō me da'ō zomasi ia. Lō siduhu ba dōdōnia ba fefu waya no moroi khōnia. 45 Bōrō me sanandrōsa khō Lowalangi ni'ombakha'ō-Gu khōmi, da'ō mbōrō wa lō faduhu dōdōmi khō-Gu. 46 Haniha ba gotaluami zi tola mamaduhu'ō wa so zambalō horō khō-Gu? Ba na U'ombakha'ō sanandrōsa khō Lowalangi, hana wa lō faduhu dōdōmi? 47 Niha soroi Lowalangi, da'ō zamondrondrongo li Lowalangi. Ba hiza, tenga moroi khō Lowalangi ami, da'ō mbōrō wa lō omasi ami wamondrondrongo." 48 Latema li Yesu ira niha Yahudi, "Hadia tenga ya'ia niwa'ōma? Ya'ugō andre niha Zamaria nira'u mbekhu." 49 Itema li Yesu, "Tenga nira'u mbekhu Ndra'odo. Ufosome Nama-Gu, ba ya'ami ba mi'o'aya Ndra'odo. 50 Tenga sangalui sumange khō-Gu samōsa Ndra'odo. So zangalui ena'ō lafosumange Ndra'o, Ya'ia andrō zanguhuku. 51 Mihaogō wanōngōni: niha solo'ō li-Gu, ba lō manō i'ila wa'amate irugi zi lō aetu." 52 Aefa da'ō lamane khō

Yesu ira niha Yahudi andrō, "Ma'ila iada'e wa sindruhu nira'u mbekhu Ndra'ugō! No mate Gaberahamo, ba si manō gōi ndra sama'ele'ō. Ba hiza Ōmane, 'Niha solo'ō li-Gu, lō mate dania irugi zi lō aetu.' 53 Na no mate Gaberahamo, awō ndra sama'ele'ō, haniha Ndra'ugō andre? Hewisa wa abōlō ebua Ndra'ugō moroi khō namama Aberahamo!" 54 Itema li Yesu Imane, "Na Usuno Ndra'o samōsa, lō eluaha wanuno-Gu andrō. Ama-Gu zanuno Ya'o niwa'ōmi Lowalangimi, 55 ba hiza lō'ō sa mi'ila Ia. U'ila Ia. Na Umane lō U'ila Ia ba falimo Ndra'o, si mane ya'ami. U'ila Ia ba U'o'ō li-Nia. 56 Wa'omuso dōdō namami Aberahamo andrō na i'ila luo khō-Gu. Omuso dōdōnia, me no i'ila!" 57 Imane ira niha Yahudi andrō khō Yesu, "Lō irugi lima wulu fakhe ndrōfi-U, ba hadia no ō'ila Gaberahamo?" 58 Itema li Yesu, "Sindruhu niwa'ō-Gu khōmi: no so Ndra'odo, fatua lō si tumbu Gaberahamo." 59 Maoso niha Yahudi lahalō gara ba wanebu Yesu; ba hiza, Ibini'ō Ia Yesu, ba Irōi Nomo Zo'aya andrō.

9:1 Me mowaōwaō Yesu i'ila niha sau'a i'otarai wa'atumbunia. 2 Lasofu khō Yesu ira nifahaō-Nia, "He Samahaō, hana wa au'a niha andrō i'oroi ba wa'atumbu? Hadia, bōrō horōnia ma zui bōrō horō zatuania?" 3 Itema li Yesu, "Tenga bōrō horōnia wa au'a ia ba tenga gōi bōrō horō ndra satuania. Au'a ia ena'ō la'ila niha wa'abōlō Lowalangi khōnia. 4 Andrō fatua moluo, da tahalō halōwō zamatenge Ya'o. Bōrō me lō ara tō bongi, ba samōsa lō si tola mohalōwō sa'ae. 5 Ya'odo haga gulidanō fatua so Ndra'o ba gulidanō andre." 6 Me no aefa Iwa'ō da'ō Yesu, mangendrilo Ia tou ba danō Ifaruka dambu ba gilo andrō. Aefa da'ō Igule'ō danō sabasō ilo ba hōrō niha andrō, 7 Imane khōnia, "Ae'e, sasai mbawau ba mbawa Ziloa." (Siloa eluahania 'Tefatenge'.) Numalō niha andrō ba wanasai bawania. Me mangawuli ia, izumagō tola i'ila niha. 8 Si fahatō omo khōnia awō niha si no mangila ya'ia wangandrōngandrō buala, lamane, "Hadia tenga niha si dadao wangandrōngandrō buala ia andre?" 9 So zanguma'ō, "Ya'ia." Ba so gōi zanguma'ō, "Tenga, si fakhilikhili khōnia da'ō." Ba hiza imane niha andrō, "Ya'odo da'ō." 10 Lasofu khōnia, "Hewisa wa tola ōfuli ō'ila niha." 11 Imane wanema li, "Niha sotōi Yesu zame'e ma'ifu tambu, ba Igule'ō ba hōrōgu ba Imane, 'Ae'e sasai mbawau ba mbawa Ziloa.' Andrō wa mōi ndra'o. Ba me usasai mbawagu, tola u'ila niha." 12 Lasofu lamane, "Hezo niha da'ō?" Imane, "Lō u'ila." 13 La'ohe niha andrō khō ndra Farizai'o. 14 Luo Sabato me luo Ibasōi danō andrō faoma ilo-Nia Yesu ba wamadōhō hōrō niha andrō. 15 Lafuli lasofu ba niha da'ō hewisa wa tola dōhō hōrōnia. Itema li niha da'ō, "Ilau dambu sombuyu ba hōrōgu, aefa da'ō usasai hōrōgu, ba ufuli u'ila niha." 16 Lamane ōsa ira Farizai'o andrō, "Lō duhu wa moroi ba Lowalangi niha samalua da'e, bōrō me Isawō gamakhoita agama ba luo Sabato." Lamane tanō bō'ō, "Hezo wa tola Ifalua zahōlihōli dōdō andre, niha si so horō?" No fabō'ō zinōndra niha andrō. 17 Lafuli lasofu ba niha andrō, lamane, "Fanguma'ōu, Ya'ia zamadōhō wa tola ō'ila niha? Na si manō hewisa gera'erau khō-Nia?" Imane niha andrō, "Sama'ele'ō Ia." 18 Ba hiza lō faduhu dōdō niha Yahudi wa sau'a mbōrōta niha andrō ba iada'e no i'ila niha. Lō faduhu dōdōra fatua lō lakaoni zatua niha andrō, 19 ba wanofu, "Hadia sindruhu no sau'a i'otarai ba wa'atumbu nonomō andre? Hewisa wa tola i'ila niha mangawuli iada'e?" 20 Latema li satua niha andrō, "Sindruhu onoma da'e; ba no sau'a ia i'otarai wa'atumbu. 21 Ba hewisa wa tola i'ila niha iada'e, lō aboto ba dōdōma. Ba haniha zamadōhō hōrōnia lō ma'ila. Misofu manō khōnia. No satua sa'ae ia, ba no tola itema li samōsa." 22 Lamanō ira satua niha andrō bōrō me ata'u ira ndra salawa niha Yahudi; bōrō me no mamagōlō ndra salawa niha Yehuda, wa laheta moroi ba gosali niha so'akui wa Razo Sangorifi nifabu'u Lowalangi Yesu andrō. 23 Da'ō mbōrō wa lamane ira satua niha andrō, "No satua ia; misofu khōnia." 24 Lakaoni zui niha sau'a ba mbōrōta andrō, ba lamane khōnia, "Ae ba hōlu wa ōwa'ō zindruhu. Ma'ila wa niha andrō no niha si so horō." 25 Imane niha andrō, "Hadia si so horō ia ma lō'ō, lō aboto ba dōdōgu. Sambua ni'ilagu; wa sau'a ndra'o mbōrōta, ba iada'e ba no

u'ila niha." 26 Lafuli lamane zui khōnia, "Hadia nilau-Nia khōu? Hewisa wamadōhō-Nia hōrōu?" 27 Imane niha andrō, "No u'ombakha'ō khōmi, ba hiza lō omasi ami mifondrondrongo. Hana nasa wa manofu ami? Hadia omasi ami gōi tobali nifahaō-Nia?" 28 Mofōnu ira khōnia ba lamane, "Ya'ugō nifahaō-Nia, tenga ya'aga! Nifahaō Moze ndra'aga. 29 Sanandrōsa khō Moze aboto ba dōdōma wa no fahuhuo khōnia Lowalangi. Ba niha andrō, lō na'i ma'ila heza moroi Ia." 30 Itema li niha andrō imane, "Ae, ahōli dōdōda wa lō mi'ila heza moroi niha andrō, hewa'ae no Ifadōhō hōrōgu. 31 Aboto ba dōdōda wa lō ifondrondrongo Lowalangi ba niha si so horō. Ha samosumange Lowalangi nifondrondrongonia li, ba samalua somasi Lowalangi. 32 I'otarai mbōrōta gulidanō, lō irai terongo so niha sau'a i'otarai wa'atumbunia, si tola mangila niha mangawuli. 33 Na tenga moroi khō Lowalangi niha andrō, tebai Ilau zi manō." 34 Latema linia ira salawa niha Yehuda, lamane, "Niha si so horō ndra'ugō i'otarai narō gaheu numalō ba galizuzumō, i'otarai wa'atumbumō, hewisa wa'ōfahaō ndra'aga?" Lafofanō ia ba i'otarai da'ō latenawa ia we'amōi ba gosali andrō. 35 Irongo Yesu wa no lafofanō niha andrō moroi ba gosali. Me falukha Yesu ba niha andrō, Imane khōnia Yesu, "Hadia, faduhu dōdōu khō Nono Niha nifatenge Lowalangi?" 36 Itema li niha andrō, imane, "Ha niha Ia, Ama? Ombakha'ō khōgu ena'ō tola faduhu dōdōgu khō-Nia!" 37 Itema li Yesu, "No ō'ila Ia. Ya'ia zi fahuhuo khōu iada'e." 38 Imane niha andrō, "Faduhu dōdōgu, So'aya." Mangalulu ia fōna Yesu. 39 Imane Yesu, "Mōi Ndra'o ba gulidanō andre ba wamatōrō fanguhuku; ena'ō la'ila niha sau'a, ba tobali au'a zangila niha." 40 So ōsa ndra Farizai'o samondrongo niwa'ō Yesu andrō, lamane wanofu khō-Nia, "Hadia Ōwa'ō tōdōu sau'a ndra'aga gōi?" 41 Itema li Yesu, Imane, "Na sau'a ami, ba tenga si so horō ami. Ba hiza bōrō me mimane, 'Ma'ila niha,' eluahania si so horō ami nasa."

10:1 "Sindruhu niwa'ō-Gu khōmi: Niha si mōi bakha ba kandra mbiribiri, sanawō ba'aba'a, si lō manōrō bawa ndrūhō, no sanagō ba samara'u. 2 Niha sanōrō bawa ndrūhō, da'ō gubalo mbiribiri. 3 Ibokai mbawa ndrūhō sanaro khō gubalo andrō, ba larongo li gubalo na ikaoni mbiribirinia molo'ō tōira; aefa da'ō i'ohe ira baero. 4 Me no aefa i'ohe baero mbiribiri andrō, mowaōwaō ia fōna, ba la'o'ō ia biribiri moroi furi, bōrō me latōngōni linia. 5 Lō omasi ira la'o'ō niha bō'ō, lalau na'i molo'i bōrō me no la'ila linia." 6 Lō aboto ba dōdō niha samondrongo dumaduma nidunōdunō Yesu andrō. 7 Ifuli Imane Yesu, "Sindruhu Niwa'ō-Gu andre: Ya'odo mbawa ndrūhō ba mbiribiri andrō. 8 Si tohare fōna-Gu ba sanagō ba samara'u, ba lō lafondrondrongo lira biribiri. 9 Ya'odo mbawa ndrūhō. Auri zanōrō Ya'o; isōndra gō na mōi ia bakha, ba he na mōi ia baero. 10 So zanagō, ha ba wamunu awō wamakiko. Andrō wa so Ndra'o ena'ō lasōndra wa'auri solo'ō li-Gu ba fahōna khōra. 11 Ya'odo gubalo si sōkhi. Itehegō mate ia fōna mbiribiri kubalo si sōkhi. 12 Enoni nibu'a gazi, tenga kubalo ia, ba tenga gōi sokhō biribiri. Na i'ila tohare nasu gatua, ilau molo'i ba irōi mbiribiri andrō, ba ira'u mbiribiri andrō asu gatua ba ifazawili. 13 Molo'i genoni nigazi andrō bōrō me mohalōwō ia bōrō gazi; lō ba dōdōnia mbiribiri andrō. 14 Ya'odo gubalo si sōkhi. Si mane fangila nama Ya'o awō wangila-Gu Ama, si manō gōi wangila-Gu biribiri-Gu ba la'ila gōi Ndra'o. Utehegō noso-Gu khōra. 16 So nasa mbiribiri khō-Gu tanō bō'ō, tenga si fao ba ngawawa andre. U'ohe ira gōi ba lafondrondrongo li-Gu. Tobali ha sambua ngawawa ira ba ha samōsa gubalo. 17 I'omasi'ō Ndra'o Ama bōrō me Utehegō noso-Gu ena'ō tola Utema ia mangawuli. 18 Samōsa lō si tola morabu noso andrō moroi khō-Gu. Ba hiza ba wa'aohagōlō Utehegō noso-Gu. Tola Ube'e ba tola Utema mangawuli. Da'ō halōwō niwa'ō Nama khō-Gu." 19 Ibōrōtaigō fasoso niha Yahudi, me Imanō wehede Yesu. 20 Ato zanguma'ō, "No ira'u Ia bekhu! No owōhō Ia! Hadia guna mifondrondrongo khō-Nia?" 21 So gōi niha tanō bō'ō sanguma'ō, "Tenga si manō huhuo niha nira'u mbekhu! Heza tola ibali'ō sangila niha zau'a bekhu?" 22 So niha sato ba Yeruzalema ba wangamoni'ō Omo Zo'aya.

Bawa deu me inōtō da'ō. 23 Mowaōwaō Yesu ba godayama Zalomo ba Nomo Zo'aya, 24 me lafasui Yesu ira salawa niha Yahudi, lamane, "Hawa'ara nasa Ōbe'e aombō dōdōma? Ombakha'ō khōma, na sindruhu Razo Sangorifi andrō nifabu'u Lowalangi Ndra'ugō." 25 Ite ma li Yesu, "No Uwa'ō khōmi, ba hiza lō faduhu dōdōmi. Halōwō andrō nihalō-Gu ba dōi nama-Gu, zamaduhu'ō sanandrōsa khō-Gu. 26 Lō faduhu dōdōmi bōrō me tenga biribiri-Gu ami. 27 Larongo li-Gu biribiri-Gu. U'ila ira, ba la'o'ō Ndra'o. 28 Ube'e khōra wa'auri sindruhu ba si lō tebulō. Lō matemate ira, ba samōsa lō si tola manōbi ya'ira moroi ba wondrorogō-Gu. 29 Abōlō ebua moroi ba hadia ia fefu nama-Gu, same'e ya'ira khō-Gu. Ba samōsa lō si tola morabu ya'ira moroi ba wondrorogō Nama. 30 Ha sambua Ndra'aga Nama." 31 Aefa da'ō lahalō gara ira salawa niha Yahudi ba wanebu Yesu. 32 Ba hiza Imane khōra Yesu, "No mi'ila Ulau halōwō si sōkhi, ni'o'ou Nama Ya'o famalua; heza moroi ba halōwō andrō zi tobali bōrō wa mitebu Ndra'o?" 33 Latema li ira salawa niha Yahudi, "Matebu Ndra'ugō kara tenga bōrō halōwō si sōkhi andrō, hiza bōrō Ō'o'aya Lowalangi! Niha Ndra'ugō andre ba Ōfaduhu'ō wa Lowalangi Ndra'ugō!" 34 Imane wanema li Yesu, "Hadia, tenga no so ba zura huku agama khōmi: Imane Lowalangi, 'lowalangi ndra'ugō'? 35 Ba fefu ita tafaduhu'ō wa lō tewu'ai nisura ba Mbuku Ni'amoni'ō andrō. Na ba zanema Taroma Li Lowalangi andrō, ikaoni Lowalangi khōra 'lowalangi', 36 hana wa miwa'ō sango'aya Lowalangi Ndra'o me Uwa'ō ono Lowalangi Ndra'odo? No nifili Nama Ndra'o nifatenge ba gulidanō. 37 Na lō Ufalu halōwō Nama, tatu lō faduhu dōdōmi khō-Gu. 38 Ba hiza, no Uhalō halōwō Nama, hewa'ae lō faduhu dōdōmi khō-Gu, si lō'ō lō'onia faduhu dōdōmi ba nilau-Gu, ena'ō aboto ba dōdōmi wa ha sambua Ndra'aga Nama, Ya'ia ba khō-Gu, ba Ya'o ba khō-Nia." 39 Latandraigō zui wondra'u Yesu, ba hiza aefa Ia ba dangara. 40 Numalō yefo Nungo Nidanō Yoridano Yesu, ba nahia Yohane wamayagō idanō no, ba torōi Ia ba da'ō. 41 Ato niha sangondrasi Ya'ia. Lamane, "Lō ilau zahōli dōdō Yohane, ba hiza fefu niwa'onia sanandrōsa ba Niha andre, no sindruhu." 42 Ato niha si faduhu tōdō khō Yesu ba da'ō.

11:1 So niha sofōkhō, sotōi Lazaro. Ba Mbetania torōi ia, ba mbanua ndra Maria ba Marata, si fatalifusō. 2 Maria andrō zamaduwa fanikha samohua ba gahe Yesu, ba solosi faoma bunia. Lazaro sofōkhō andrō no talifusōnia. 3 Lafa'ohē'ō duria khō Yesu si fatalifusō andrō, lamane, "He So'aya, mofōkhō nawō Zo'aya ni'omasi'ō andrō." 4 Me Irongo duria andrō Yesu, Imane, "Tenga solohe ba wa'amate wōkhōnia andrō. Mofōkhō Lazaro ena'ō tefolakhōmi Lowalangi; ba ena'ō bōrō da'ō tola tefosumange Nono Lowalangi." 5 I'omasi'ō Yesu ndra Marata ba ira talifusōnia. 6 Ba hiza me Irongo duria wa mofōkhō Lazaro, I'odōdōgō torōi nasa Yesu dua ngaluo tō ba da'ō, 7 Aefa da'ō awena muhede Ia khō ndra nifahaō-Nia Imane, "Mitabu tafuli ita ba Yudea." 8 Lamane ira nifahaō-Nia, "He Guru, awena na'i latebu kara Ndra'ugō ena'ō ira niha Yahudi, ba iada'e omasi mangawuli'ō ba da'ō?" 9 Imane wanema li Yesu, "Hadia tenga felendrua za zi ma'ōkhō?" Na mowaōwaō niha ba zi ma'ōkhō lō manendre gahenia, bōrō me i'ila haga gulidanō andre. 10 Ba na mowaōwaō niha ba zi bongi, manukōu ia bōrō me lō haga khōnia. 11 Si manō wehede Yesu. Aefa da'ō ifuli Imane, "No mōrō nawōda Lazaro, ba hiza mōi Ndra'o wanusugi ya'ia." 12 Lamane ira nifahaō Yesu, "He So'aya, na si mōrō Lazaro, dōhō ia dania." 13 Edōna Iwa'ō Yesu sindruhunia wa no mate Lazaro. Ba hiza, lawalinga da'ō gohitō dōdō Yesu wa sindruhundruhu no mōrō Lazaro. 14 Andrō I'osindruhugō wangombakha khōra Yesu Imane, "No mate Lazaro. 15 Ba hiza moguna khōmi fefu da'ō, andrō wa omuso dōdō-Gu wa lō Ya'o ba da'ō, ena'ō faduhu dōdōmi. Mitabu we'amōi khō Lazaro." 16 Toma andrō nifotōi "Si Faero" imane ba nawōnia nifahaō, "Mitabu we'amōi, ena'ō mate dania ita awō-Nia!" 17 Me irugi nahia andrō Yesu, no ōfa ngaluo me no lako'o Lazaro. 18 Fa'arōu gotaluara Mbetania ba Yeruzalema lō tōra moroi ba zi tōlu kilomete. 19 Ato

niha Yahudi sangondrasi Maria ba Marata ba wondrara tōdōra bōrō wa'amate Lazaro talifusōra matua andrō. 20 Me irongo Marata tohare Yesu, numalō ia baero wamaondragō Ya'ia, ba torōi bakha ba nomo Maria. 21 Aefa da'ō imane Marata khō Yesu, "He So'aya, na so Zo'aya ba da'e, ba lō mate dalifusōgu! 22 Ba hewa'ae si manō, aboto ba dōdōgu na so ni'andrō Zo'aya khō Lowalangi iada'e, Ibe'e khō Zo'aya Lowalangi." 23 Imane Yesu khō Marata, "Auri dania mangawuli dalifusōmō." 24 Imane wanema li Marata, "Aboto ba dōdōgu wa ifuli auri dania Lazaro na inōtō tesusugi niha si no mate ba Luo Safuria." 25 Imane Yesu khō Marata, "Ya'odo zanusugi niha, ba Ya'odo zame'e fa'auri ba niha. Auri dania zamati khō-Gu hewa'ae mate ia. 26 Niha sauri ba samati khō-Gu, lō mate irugi zi lō aetu. Hadia faduhu dōdōu ba da'ō?" 27 Imana li Marata, "He So'aya, faduhu dōdōgu wa Ya'ugō Zo'aya Nono Lowalangi, Razo Sangorifi nifatenge tou ba gulidanō andre." 28 Me no aefa iwa'ō da'ō Marata, mōi ia mukaoni Maria talifusōnia ba ingōngōgō khōnia imane, "No so ba da'e Guru; isofu ndra'ugō." 29 Me irongo da'ō Maria i'aliō'ō maoso ia wamalukhaisi Yesu. 30 Me inōtō da'ō, lō si mōi ba mbanua nasa Yesu. Ba nahia si falukha Ia khō Marata so Ia. 31 La'ila, maoso Maria ira niha Yahudi sondrara tōdōnia, ba nomo, numalō ia baero; mōi ira la'o'ō ia bōrō me lawalinga numalō ia ba lewatō ba ilau me'e ba da'ō. 32 Me irugi Maria nahia si so Yesu ba me i'ila Yesu, mangalulu ia fōna Yesu ba imane, "He So'aya, na so ndra'ugō ena'ō ba da'e, ba lō mate dalifusōgu!" 33 Ahakhō sibai dōdō Yesu me I'ila me'e Maria awō niha Yahudi si fao khō Maria. 34 Isofu khōra Imane, "Hezo miko'o ia?" Lamane wanema li, "He So'aya, tabu ae'e faigi." 35 Ilau me'e Yesu. 36 Lamane ira niha Yahudi, "Faigi, fondrege wa'omasi-Nia Lazaro!" 37 Ba so ōsa ba gotaluara zanguma'ō, "Tola i'ila niha sau'a Ibe'e, hana wa tebai Itaha ena'ō bōi mate Lazaro?" 38 Si fao fa'alangu dōdō numalō Yesu ba lewatō. Hulō dōgi nari hili lewatō andrō, nibalugō faoma kara sebua. 39 Imane Yesu, "Miheta gara andrō." Imana li Yesu Marata talifusō zi mate andrō imane, "Hiza So'aya, no ōfa ngaluo no lako'o ia. Te no abōu sa'ae!" 40 Imane Yesu khō Marata, "Tenga no Uwa'ō khō: Na mamati ndra'ugō tola ō'ila lakhōmi Lowalangi!" 41 Ba laheta gara andrō. Ifaōga hōrō-Nia Yesu miyawa ba mbanua ba Imane, "U'andrō saohagōlō khō-U, Ama, bōrō me no Ōfondrondrongo gangandrōwa-Gu. 42 U'ila wa lō mamalō Ōfondrondrongo gangandrōwa-Gu, ba hiza Uwa'ō da'e bōrō niha sato andre; ena'ō faduhu dōdōra wa no Ya'ugō zamatenge Ya'o." 43 Me no aefa Iwa'ō da'ō Yesu, mu'ao Ia ebua li-Nia Imane, "He Lazaro, ae baero!" 44 Mōi baero niha si no mate andrō. No te'olohuni muko gahe awō dangania, ba bawania no mubalugō faoma muko. Imane Yesu ba niha si so ba da'ō, "Mibokai muko andrō khōnia, ba mi'efa'ō ia." 45 Ato niha Yahudi sangondrasi Maria, faduhu dōdōra khō Yesu me la'ila zalua andrō. 46 Ba hiza so gōi ba gotaluara zangawuli khō ndra Farizai'o ba wangombakha hadia ia zi no Ifalua Yesu andrō. 47 Bōrō da'ō lalau rafe ira Farizai'o awō ndra ere sebua si fao sanguhuku ba Agama. Lamane, "Hadia nilauda? Oya Ilau zahōli dōdō niha andre! 48 Na tatehegō manō khō-Nia zi manō, faduhu dōdō niha fefu khō-Nia. Ba gafuriata tohare zalawa Romawi ba lafakiko Nomo Zo'aya awō fefu soida!" 49 Samōsa ba gotaluara Gayafa, si tobali Ere Sebua ba ndrōfi andrō, sanguma'ō, "Lō mi'ila hadia ia. 50 Hadia lō aboto ba dōdōmi wa bōrō niha sato, abōlō sōkhi mate zi samōsa moroi na fefu soi tekiko?" 51 Iwa'ō wehede andrō Kayafa, sindruhunia tenga moroi ba gera'erania samōsa. Ba hiza ba wa'a'erenia ba ndrōfi andrō no ifa'ele'ō wa mate dania Yesu soguna ba niha Yahudi. 52 Ba tenga ha ba niha Yahudi, ba ndraono Lowalangi si zawili gofu heza ni'osambua'ō dania gōi. 53 I'otarai ngaluo andrō mamagōlō ndra salawa niha Yahudi ba wamunu Yesu. 54 Bōrō da'ō lō sa'ae I'oroma'ō Ia Yesu ba Yudea. Irōi Yudea, numalō Ia ba mbanua sotōi Eferai ahatō ba danō si mate. Torōi Ia ba da'ō awō ndra nifahaō-Nia. 55 Me inōtō da'ō no ahatō Gowasa Fasa ba niha Yahudi. Ato niha mbanua si numalō ba Yeruzalema ba wamalua amakhoita fangehao fatua lō Owasa. 56 Me so ira ba Nomo Zo'aya, la'alu'alui Yesu. Faoma lasofu khō nawōra, "Hewisa dōdōu? Tatu lō

mōi Ia ba gowasa andre!" 57 No labe'e wareta ira ere sebua awō ndra Farizai'o, ena'ō la'ombakha'ō hezo so Yesu na so zangila, ena'ō tola lara'u Yesu.

12:1 Ōnō ngaluo fatua lō irugi Gowasa Fasa, numalō Yesu ba Mbetania. Ba nahia andrō mate Lazaro ba ifuli I'orifi mangawuli Yesu. 2 Labe'e gō-Nia ba da'ō, Marata zama'anō gō, ba fao Lazaro awō-Nia wemanga. 3 Aefa da'ō tohare Maria. So khō-Nia mato matonga kilo wanikha samohua sebua sibai bōli. Ifaduwa wanikha andrō ba gahe Yesu. Aefa da'ō i'osi gahe Yesu faoma bunia. Anōnō zi sambua omo andrō hua wanikha samohua. 4 Yuda banua Gariota, samōsa ba gotalua nifahaō Yesu -- ba si manga mbōlinia dania -- imane, 5 "Hana wa lō la'amawa wanikha samohua andrō, ba tola mobōli tōlu ngaotu rufia firō, ba labe'e mbōlinia ba niha si numana?" 6 Imanō wanguma'ō Yuda tenga bōrō wa'ahakhō dōdōnia zi numana, no bōrō me sanagōnagō ia. Asese ihālō gefera fefu ni'irō'ōra khōnia. 7 Ba hiza Imane Yesu, "Bōi mitegu ndra alawe andrō ba wanikha samohua andrō khōnia! Ilau da'e ba wama'anō fogo'o Ya'o. 8 Lō mamalōmalō ba gotaluami zi numana, ba tenga si'ogōtō'ō Ndra'o ba gotaluami." 9 Ato niha Yahudi si numalō ba Mbetania me larongo so Yesu ba da'ō. Tenga ha bōrō Yesu wa numalō ira ba da'ō, hiza omasi ira gōi wamaigi Lazaro si no I'orifi mangawuli Yesu. 10 Da'ō mbōrō wa omasi labunu gōi Lazaro ira ere sebua; 11 ha bōrō ia wa ato niha Yahudi sondrōi samatōrō ya'ira ba faduhu dōdōra khō Yesu. 12 Mahemolu da'ō larongo niha sato si tohare ba Gowasa Fasa wa so ba dalu lala Yesu numalō ba Yeruzalema. 13 Oi zara lahalō mbulu nohi wamaondragō Ya'ia. Mu'ao ira lamane, "Nisuno Lowalangi! Ya'ahowu Ia si so ba dōi Zo'aya! Ya'ahowu Razo niha Gizera'eli!" 14 Me inōtō da'ō I'okudo sara nono galide nisōndra-Nia. Faudu da'ō ba zi no tesura ba Mbuku Ni'amoni'ō: 15 "Bōi ata'ufi ya'ugō banua Ziona! Faigi, tohare Razou, I'okudo sara nono galide!" 16 Me inōtō da'ō lō aboto ba dōdō ndra nifahaō Yesu geluaha fefu da'ō. Ba me no aefa tefolakhōmi Yesu, me no aefa teforōfa ba te'orifi Ia mangawuli, awena itōrō tōdōra wa no tesura ba Mbuku Ni'amoni'ō sanandrōsa khō-Nia, awō wa no lalau khō-Nia da'ō fefu. 17 Niha si so me Ikaoni baero Lazaro moroi ba lewatō awō wa I'orifi mangawuli, lō aetu latutunō ba niha bō'ō da'ō. 18 Da'ō mbōrō wa ato niha sangondrasi Yesu bōrō me no larongo Ifalua zahōli dōdō andrō. 19 Faoma lamane khō nawōra ira Farizai'o, "Hadia nisōndrada! Faigi atō, mōi khō-Nia fefu zi sagōrō ulidanō!" 20 Ba gotalua niha sato si mōi mangalulu ba ginōtō gowasa, so ōsa niha Yunani. 21 La'ondrasi Wilifo ba lamane, "He talifusō, na tola omasiga falukha khō Yesu." (Banua Mbetisa'ida Wilifo ba Galilea.) 22 Mōi Wilifo wangombakha da'ō khō Gandrea, aefa da'ō mōi ira darua ira wangombakha khō Yesu. 23 Imane khōra Yesu, "No irugi inōtō tefolakhōmi Nono Niha nifatenge Lowalangi. 24 Mihaogō wanōngōni. Na lō mutaru zi sambua ulitō ba danō, ba na lō obou, lō tebulō ha sambua tanōmō ia. Ba na obou danōmō andrō, awena tesōndra mbua soya. 25 Sangomasi'ō fa'aurinia ba gulidanō andre, da'ō zi lō manōndra fa'auri sindruhu ba si lō aetu. Ba niha si lō ba dōdō fa'aurinia ba gulidanō andre, da'ō dania zanōndra fa'auri sindruhu ba si lō aetu. 26 Si mōi enoni-Gu, lō tola lō'ō i'o'ō Ndra'o; ena'ō ba zi so Ndra'o so genoni-Gu. Ifosumange Amagu zi mōi enoni-Gu." 27 "Abu dōdō-Gu; hadia niwa'ō-Gu iada'e? Hadia Umane, 'He Ama, bōi tehegō Utōrō wamakao andre'? Ba hiza ba wanōrō famakao andrō so Ndra'o. 28 He, Ama folakhōmi dōi-Mō!" Ba terongo li moroi ba mbanua sanguma'ō, "No Ufolakhōmi Ia, ba Ufuli Ufolakhōmi dania." 29 Larongo li andrō niha sato si so ba da'ō. Lamane, "Ugu'ugu mbanua da'ō!" Ba so gōi zanguma'ō, "Tenga! Muhede khō-Nia mala'ika!" 30 Imane khōra Yesu, "Tenga soguna khō-Gu wa terongo li andrō, no soguna khōmi. 31 Iada'e no irugi inōtō tehuku gulidanō; te'alani zalawa gulidanō andrō iada'e. 32 Na no dania te'alawa'ō Ndra'o yawa ba danō, Udōnisi khō-Gu fefu niha." 33 Imanō wanguma'ō hewisa dania waōwaō wamorōfa Ya'ia. 34 Lamane khō-Nia niha sato, "Molo'ō huku agama, auri Razo Sangorifi nifabu'u andrō irugi zi lō



aetu. Hana wa Ōwa'ō te'alawai'ō ba dete danō Nono Niha nifatenge Lowalangi andrō? Haniha Nono Niha nifatenge Lowalangi andrō?" 35 Imane wanema li Yesu, "Ha ba zi lō arara so haga andrō ba gotaluami. Tobali mitohugō wofanōmi fatua so haga, ena'ō lō gōna ami fa'ogōmi. Lō i'ila heza numalō ia niha sowaōwaō ba dalu zogōmigōmi. 36 Mi'amati ba haga andrō fatua so Ia khōmi, ena'ō tobali iraono haga ami." Me no aefa Iwa'ō da'ō Yesu, mofanō Ia moroi ba da'ō ba lō Iforoma'ō Ia khōra. 37 Oya zahōli dōdō nilau Yesu fōnara. Ba hewa'ae si manō lō sa'atō faduhu dōdōra khō-Nia. 38 Ba zi manō alua niwa'ō Yesaya sama'ele'ō. Da'e niwa'ōnia, "He So'aya, haniha zi faduhu tōdō ba duria khōma? Ha'ōkhō teforoma'ō wa'abōlō Lowalangi?" 39 Da'ō mbōrō wa tebai faduhu dōdōra, bōrō me no imane gōi Yesaya, "Imane Lowalangi, 40 'Ufobalunō hōrōra, ba U'ogōmigōmisi gera'erara; irege lō mangila hōrōra, ba lō teboka gera'erara. Ena'ō lō mangawuli ira khō-Gu, fa bōi Ufadōhō ira." 41 Imanō wehede Yesaya sanandrōsa khō Yesu bōrō me no i'ila lakhōmi Yesu. 42 Ba hewa'ae si manō, ato gōi ndra salawa niha Yahudi zi faduhu tōdō khō Yesu. Ba hiza aiwō ira wangombakha da'ō, bōrō me ata'u ira na laheta moroi ba gosali ira, ira Farizai'o. 43 Abōlō omasi ira zumange nibe'e niha moroi ba zumange soroi Lowalangi. 44 Mu'ao Yesu Imane, "Si faduhu tōdō khō-Gu, tenga ha khō-Gu faduhu dōdōnia, no khō zamatenge Ya'odo andrō gōi. 45 Ba sangila Ya'o, no i'ila Nama samatenge Ya'o. 46 Hulō haga we'amōi-Gu ba gulidanō, ena'ō lō torōi ba zogōmigōmi niha si faduhu tōdō khō-Gu. 47 Samondrondrongo famahaō-Gu, ba si lō molo'ō -- tenga Ya'o zanguhuku ya'ia. Bōrō me tenga ba wanguhuku ulidanō andre so Ndra'o, no ba wangorifi ya'ia. 48 So dania zanguhuku niha si lō omasi manema Ya'o ba si lō molo'ō taroma li-Gu. Turia nifa'ema-Gu andrō, da'ō zi tobali sanguhuku ya'ia ba Luo Safuria! 49 Sindruhu da'ō! Bōrō me lō irai muhede Ndra'o ba zomasi dōdō-Gu; Ama samatenge Ya'o, zangombakha khō-Gu hadia niwa'ō-Gu ba hadia ni'ombakha'ō-Gu. 50 Ba aboto ba dōdō-Gu wa oroisa-Nia andrō zame'e fa'auri sindruhu ba si lō aetu. Hadia niwa'ō-Gu no ni'o'ou Nama Ndra'o wanguma'ō."

13:1 Ma'ōkhō tō lō Owasa Fasa, aboto ba dōdō Yesu wa no irugi inōtō Irōi gulidanō andre mangawuli Ia khō Nama-Nia. No l'omasī'ō niha gulidanō andre, ba irugi ba gafuriata l'omasī'ō ira nasa. 2 Manga ba zi bongi Yesu awō ndra nifahaō-Nia. No ifatumbu'ō Afōkha ba dōdō Yuda, banua Gariota wemanga mbōli Yesu. 3 Aboto ba dōdō Yesu wa no Ibe'e khō-Nia fefu kuaso Ama-Nia. Aboto gōi ba dōdō-Nia wa moroi khō Lowalangi Ia ba mangawuli Ia khō Lowalangi dania. 4 Bōrō da'ō Ilau muzizio ba zinga meza, Ibokai mbaru-Nia sebua, Ibōbō lembe lōwilōwi-Nia. 5 Ifaduwa yawa ba garawa nidanō, ibōrōtaigō Isasai gahe ndra nifahaō-Nia ba l'otufōi faoma lembe si so ba lōwilōwi-Nia. 6 Me Irugi Zimoni, imane khō-Nia Simoni, "He So'aya, hadia lō tola lō'ō Ya'ugō zanasai ahegu?" 7 Ite ma li Yesu, "Lō aboto ba dōdōu iada'e hadia nilau-Gu andre, ba aboto ba dōdōu dania." 8 Imane Fetero khō Yesu, "Bōi, So'aya. Bōi Ya'ugō zanasai ahegu!" Imane Yesu khō-Nia, "Na lō Usasai gaheu, ba tebai mōi ndra'ugō nifahaō-Gu sa'ae." 9 Imane wanema li Fetero, "Na si manō So'aya, bōi ha ahegu sasai, fao gōi danga awō hōgōgu!" 10 Imane Yesu khō Wetero, "No tehaogō mboto niha si no mondri. Lō moguna tesasai ia sa'ae; ha ahenia zoguna nisasai. No muhaogō ami andre, ba hiza lō fefu manō." ( 11 Aboto ba dōdō Yesu haniha zi manga mbōli-Nia. Da'ō mbōrō wa Imane, "No muhaogō ami andre, ba hiza lō fefu manō.") 12 Me no aefa Isasai gahera Yesu, ifuli Ifake mangawuli mbaru-Nia sebua, ba mudadao Ia. Aefa da'ō Imane khōra, "Hadia aboto ba dōdōmi hadia nilau-Gu khōmi andrō mege? 13 Mikaoni khō-Gu Guru ba So'aya. Sindruhu da'ō: bōrō me Guru Ndra'o ba So'aya. 14 Na Ya'odo Guru ba So'aya, no usasai gahemi, lō tola lō'ō faoma misasai gahe nawōmi. 15 Ube'e dumaduma andre khōmi fefu, ena'ō gōi milau si mane nilau-Gu khōmi. 16 Mihaogō wanōngōni: Lō ebua zawuyu moroi khō zokhō ya'ia; ba lō ebua nifatenge moroi ba zamatenge. 17 No aboto ba dōdōmi da'ō iada'e; na milau da'ō, ba sohahau tōdō

ami sindruhundruhu. 18 Tenga ha khōmi fefu niwa'ō-Gu andre. Aboto ba dōdō-Gu hanihaniha zi no Utuyu. Ba hiza hadia zi no tesura ba Mbuku Ni'amoni'ō lō tola lō'ō alua; da'e nisura andrō, 'Si fao wemanga awō-Gu da'ō zolawa Ya'o dania.' 19 U'ombakha'ō iada'e khōmi fatua lō salua, ena'ō na no alua dania, faduhu dania dōdōmi wa Ya'odo andre Ia nifotōi YA'ODO SI SO. 20 Mihaogō wanōngōni: Sanema niha nifatenge-Gu ba no itema Ndra'o. Ba haniha zanema Ya'o, no itema Lowalangi samatenge Ya'o." 21 Aefa Iwa'ō da'ō Yesu, ba alangu dōdō-Nia. Imane wanguma'ō, "Sindruhu niwa'ō-Gu khōmi: Samōsa ba gotaluami zi manga mbōli-Gu dania." 22 Faoma lafaigi nawōra ira nifahaō Yesu ba oi zara manimba dōdōra. Lō aboto ba dōdōra haniha niwa'ō-Nia andrō. 23 Samōsa ba gotalua nifahaō ni'omasi'ō Yesu no dumadao ba zinga-Nia. 24 Ibe'e dandra khōnia Fetero, ena'ō isofu khō Yesu haniha niwa'ō-Nia andrō. 25 Ifahatō ia khō Yesu nifahaō andrō, isofu imane, "Haniha ia andrō, So'aya?" 26 Itema li Yesu Imane, "U'ungugō roti andrō bakha ba mako, ba Ube'e ba niha. Niha nibe'e-Gu roti andrō da'ō ia." Ihalō roti Yesu, I'ungugō bakha ba mako; aefa da'ō Ibe'e khō Yuda banua Gariota. 27 Me itema sibai roti andrō Yuda, mōi khōnia Gafōkha. Imane khōnia Yesu, "Alio'ō falua hadia zomasi'ō ōlau!" 28 Samōsa lō ba gotaluara si dadao manga ba da'ō zangila hana wa Iwa'ō da'ō Yesu khō Yuda. 29 So zanguma'ō, Ifatenge Yuda Yesu wowōli hadia ia zoguna ba gowasa andrō, ma zui I'o'ou Yuda Yesu wame'e kefe ba niha si numana -- bōrō me Yuda zololohe kefe khōra. 30 I'anema'ō mōi baero Yuda me no aefa itema roti andrō. No bongi sa'ae me inōtō da'ō. 31 Me no aefa mofanō Yuda moroi ba da'ō, Imane Yesu, "Tefolakhōmi Nono Niha nifatenge Lowalangi iada'e. Ba moroi khō-Nia tefolakhōmi gōi Lowalangi. 32 Na tefolakhōmi Lowalangi ba khō-Nia, tefolakhōmi gōi Ia ba khō Lowalangi. Ifalua da'ō Lowalangi ba zi lō ara tō. 33 He iraono-Gu, lō ara tō so Ndra'odo khōmi. Mi'alui dania Ndra'o, ba hiza si mane niwa'ō-Gu ba niha Yahudi, si manō gōi Uwa'ō khōmi: ba zi mōi Ndra'o, tebai mōi ami ba da'ō dania. 34 Mitema gorosa si bohō moroi khō-Gu: mifaoma mi'omasi'ō nawōmi. Si mane fa'omasi-Gu ami, si manō gōi ami mifaoma mi'omasi'ō nawōmi. 35 Na faoma mi'omasi'ō nawōmi, la'ila fefu niha wa nifahaō-Gu ami." 36 Isofu Simoni Fetero khō Yesu, imane, "He So'aya heza numalō'ō?" Itema li Yesu, "Mōi Ndra'o ba zi sambua nahia, ba tebai mi'o'ō Ndra'o ba nahia andrō. Ba hiza ō'o'ō sa'atō dania Ndra'o." 37 Isofu zui Fetero, "He So'aya, hana wa tebai u'o'ō Ndra'ugō iada'e. Utehegō mate ndra'o khō Zo'aya!" 38 Itema li Yesu, "Hadia, sindruhundruhu ōtehegō mate ndra'ugō khō-Gu? Haogō fondrongō; fatua lō miwo manu dania, no medōlu kali ōfaduhu'ō lō ō'ila Ndra'odo!"

14:1 Imane khōra Yesu, "Bōi mibusi dōdōmi. Mi'amati khō Lowalangi, ba mi'amati gōi khō-Gu. 2 Oya nahia ba nomo Nama-Gu. Udaridari ba da'ō wangōhōnagō nahia khōmi. Lō Uwa'ō khōmi natenga si manō ena'ō. 3 Na no aefa Uhenagō nahia khōmi, mangawuli Ndra'o wamaondragō ya'ami; ena'ō gofu heza so Ndra'o ba da'ō gōi so ami. 4 Mi'ila lala ba nahia andrō si mōi Ndra'o." 5 Imane Toma khō Yesu, "He So'aya, lō ma'ila heza mōi Ndra'ugō, hewisa wa ma'ila lala we'amōi ba da'ō?" 6 Itema li Yesu Imane, "Ya'odo lala ba wangi'ila Lowalangi, ba ba wanōndra fa'auri. Lō hadōi si tola mōi khō Nama na lō itōrō Ndra'odo. 7 Na aboto ba dōdōmi Ndra'o, ba aboto gōi ba dōdōmi Nama-Gu. I'otarai iada'e no aboto ba dōdōmi Ia, ba no mi'ila Ia." 8 Imane Filifo khō Yesu, "He So'aya, oroma'ō khōma Nama andrō, ena'ō ahono dōdōma." 9 Ba itema li Yesu Imane, "No hawa'ara faofao Ndra'o khōmi fefu, ba hadia lō saboto ba dōdōu Ndra'o, he Filifo? Si no mangila Ya'odo, da'ō gōi zangila Ama. Hewisa nasa wa ōwa'ō, 'Foroma'ō khōma Nama andrō?' 10 He Filifo! Hadia lō faduhu dōdōu, wa ha sambua Ndra'o khō Nama, ba wa ha sambua Nama ba khō-Gu? Fefu niwa'ō-Gu andre khōmi, tenga nilau dōdō-Gu. Ama andrō, sangiangō Ya'o, da'ō zangohalōwōgōigō fefu da'e. 11 Ya faduhu dōdōmi wa no sambua Ndra'o khō Nama, ba sambua Nama ba khō-Gu. Ba silō'ōlō'ōnia ba ya faduhu dōdōmi ba zi no Ufalua. 12 Sindruhundruhu

U'ombakha'ō khōmi: Niha sindruhundruhu mamati khō-Gu, tola ilau fefu zi no Ulau andrō, -- ma na'i tola ilau zabōlō ebua moroi ba da'ō -- bōrō me mōi Ndra'o khō Nama. 13 Ba gofu hadia ni'andrōmi ba dōi-Gu, Ufalua khōmi, ena'ō tefolakhōmi Nama andrō bōrō Nono. 14 Mi'andrō hadia ia ba dōi-Gu; ba Ube'e khōmi fefu da'ō." 15 "Na mi'omasi'ō Ndra'o, ba mi'o'ō fefu goroiša-Gu. 16 U'andrō dania khō Nama samōša Zanolō tanō bō'ō, ya'ia Geheha Lowalangi. Torōi Ia ba gotaluami. 17 Ya'ia andrō ba no Eheha Lowalangi, sangombakha fa'atulō Lowalangi. Lō itema ulidanō Geheha Lowalangi andrō, bōrō me lō la'ila Ia ba lō aboto ba dōdōra. Ba hiza, aboto ba dōdōmi Ia, bōrō me lō mamalō auri ba so Ia ba gotaluami. 18 Lō Urōi manō ami ha ya'ami. Mangawuli Ndra'o dania khōmi. 19 Ba zi lō ara tō lō la'ila Ndra'o niha gulidanō, ba hiza ya'ami dania zangila Ya'o; ba bōrō me auri Ndra'o, auri gōi dania ami. 20 Na no irugi ginōtō andrō dania mi'ila wa ha sambua Ndra'aga Nama-Gu, ba ha sambua ami khō-Gu, ba Ya'odo gōi ha sambua khōmi. 21 No sangomasi'ō Ya'o zanema ba solo'ō oroisa-Gu. I'omasi'ō Amagu zangomasi'ō Ya'o. Ba U'omasi'ō gōi niha da'ō, awō wa U'ombakha'ō khōnia haniha Ndra'odo andre." 22 Yuda (si tenga banua Gariota) zanofu khō Yesu imane, "He So'aya, hana wa khōma Ōforoma'ō Ndra'ugō ba tenga ba niha gulidanō?" 23 Itema li Yesu Imane, "I'o'ō goroiša-Gu niha sangomasi'ō Ya'o. Ba I'omasi'ō Ama-Gu niha si manō. Mōi Nama-Gu ba mōi Ndra'o ba niha andrō ba torōi Ndra'aga khōnia. 24 Lō i'o'ō goroiša-Gu niha si lō mangomasi'ō Ya'o. Oroisa andrō nirongomi tenga moroi khō-Gu, no oroisa Nama-Gu, samatenge Ya'o. 25 Fefu da'ō U'ombakha'ō khōmi fatua so Ndra'o ba gotaluami. 26 Ba samahaō fefu hadia ia khōmi ya'ia Geheha Lowalangi. Ya'ia andrō Zanolō nifatenge Nama ba dōi-Gu. Sanolō andrō zamasugi ba dōdōmi fefu hadia ia zi no U'ombakha'ō khōmi. 27 Urōi khōmi wa'ohahau dōdō. Fa'ohahau dōdō soroi Ndra'o Ube'e khōmi. Tenga si mane fa'ohahau dōdō nibe'e gulidanō wa'ohahau dōdō nibe'e-Gu khōmi. Bōi mibusi dōdōmi; bōi ata'u ami. 28 No mirongo me Umane, 'Mofanō Ndra'o ba hiza mangawuli-Do dania khōmi.' Na mi'omasi'ō Ndra'o, ba omuso dōdōmi na numalō Ndra'o khō Nama, bōrō abōlō ebua Nama moroi khō-Gu. 29 U'ombakha'ō da'ō khōmi iada'e, fatua lō salua, ena'ō faduhu dōdōmi dania na no alua. 30 Lō U'anau'ō wehede khōmi, bōrō me no tohare zalawa gulidanō andre. Ba hiza tenga barō mbawania Ndra'o. 31 Ba ena'ō aboto ba dōdō niha gulidanō, wa U'omasi'ō Nama, da'ō mbōrō wa Ulau hadia niwa'ō Nama khō-Gu famalua. Lau, mitabu, taheta ita ba da'e."

15:1 Imane Yesu, "Ya'odo dōla nagu sindruhu, ba Ama-Gu zohalōwō ba kabu. 2 I'ewa dozi ndraha si so khō-Gu si lō mowua; ba dozi daha sowua, Ihaogō ena'ō itugu oya mbuania. 3 Si no muhaogō ami bōrō daroma li andrō nibe'e-Gu khōmi. 4 Ena'ō si lō tebulō wa ha sambua ami ba khō-Gu ba si manō gōi Ndra'odo ba khōmi. Tebai mowua ndraha andrō ha ya'ia. Awena tola mowua ndraha, na auri ia ba dōla. Si manō gōi ami. Awena tola mowua ami na aro ami ba khō-Gu. 5 Ya'odo dōla nagu ba daha ami. Saro ba wahasambua khō-Gu ba si manō gōi Ndra'o khōnia, da'ō zoya bua; bōrō tebai milau hadia ia na lō Ya'o. 6 Niha si lō aro wahasambuania ba khō-Gu, tetibo'ō si mane daha, ba tobali dania okōli. La'owuloi ndraha si manō ba lafazaumba bakha ba galitō, aefa da'ō latunu. 7 Na lō mamalō ami khō-Gu ba mofa'auri wamahaō-Gu bakha ba dōdōmi, tola mi'andrō hadia zomasi ami; ba tebe'e khōmi ni'andrōmi andrō. 8 Tefolakhōmi Nama-Gu na oya mbuami; ba da'ō mi'oroma'ō wa sindruhu nifahaō-Gu ami. 9 U'omasi'ō ami si mane fangomasi'ō Nama Ya'o. Ya lō mamalō ami ba wa'omasi-Gu andrō. 10 Na mi'o'ō goroiša-Gu, ba lō farōi ba wa'omasi-Gu, si mane fa lō faroi-Gu ba wa'omasi Nama-Gu, me U'o'ō goroiša-Nia. 11 U'ombakha'ō da'e khōmi fefu ena'ō fao ami ba wa'omuso dōdō-Gu; ba ena'ō mo'ahonoa wa'omuso dōdōmi. 12 Da'e goroiša-Gu: mifaoma mi'omasi'ō nawōmi, si mane fangomasi'ō-Gu ami. 13 Niha sabōlō mangomasi'ō awō, ya'ia zanehegō fa'aurinia khō nawōnia andrō. 14 Awōgu ami, na mi'o'ō hadia ni'oroi'ō-Gu khōmi. 15 Lō

Ukaoni khōmi sawuyu sa'ae, bōrō me lō i'ila sawuyu hadia nilau zokhō ya'ia. Ukaoni ami, bōrō me fefu nirongogu moroi khō Nama-Gu no U'ombakha'ō khōmi. 16 Tenga ya'ami zanuyu Ya'o. Ya'odo zanutuyu ya'ami, ba Ufatenge ami ena'ō oya mbuami -- ya'ia mbua si lō obou. Ba Ibe'e khōmi Ama hadia ni'andrōmi ba dōi-Gu. 17 Da'e gorōisa-Gu khōmi: mifaoma mi'omasi'ō nawōmi." 18 "Na fatiu dōdō niha gulidanō khōmi, mitōrō tōdōmi, wa no ofōna fatiu dōdō niha gulidanō khō-Gu. 19 Na niha gulidanō ami, ba i'omasi'ō ami ulidanō hulō dana khōnia ami. Ba hiza no Utuyu ami moroi ba gulidanō andre, tobali tenga sa'ae niha gulidanō ami. Da'ō mbōrō wa fatiu dōdō niha gulidanō khōmi. 20 Mitōrō tōdōmi hadia niwa'ō-Gu khōmi, 'Lō abōlō ebua zawuyu moroi khō zokhō ya'ia.' Na no lafakao Ndra'o, lafakao ami gōi dania. Na la'o'ō wamahaō-Gu, la'o'ō gōi wamahaōmi dania. 21 Lalau fefu hadia ia khōmi bōrō me tana khō-Gu ami; ba bōrō me la'ila zamatenge Ya'o. 22 Na lō ena'ō irai mōi Ndra'o ba na lō irai U'ombakha'ō fefu da'ō khōra, lō tebe'e salara ena'ō. Ba hiza lō tahi khōra ba horōra andrō. 23 Si fatiu tōdō khō-Gu, fatiu gōi dōdōnia khō Nama-Gu. 24 No Ufalua khōra zi tebai ifalua niha bō'ō. Na lō Ufalua ena'ō fefu da'ō khōra, aheta gesuanō khōra. Ba hiza iada'e no la'ila fefu da'ō, ba fatiu dōdōra khō-Gu ba he khō Nama-Gu. 25 Alua zi manō ena'ō itōrō nisura ba mbuku Ni'amoni'ō, 'Fatiu dōdōra khō-Gu lō bōrōbōrō.' 26 Eheha Lowalangi zangombakha somasi Lowalangi, ya'ia Zanolō nifatenge-Gu dania moroi khō Nama samaduhu'ō Ya'odo khōmi. 27 Ba hiza lō tola lō'ō mifaduhu'ō Ndra'o, bōrō me no fao ami khō-Gu i'otarai wamōbōrō.

16:1 U'ombakha'ō khōmi fefu da'ō fabōi farōi ami. 2 Labe'e baero ami moroi ba nomo wangandrō. Ba so ginōtō dania wa niha samunu ya'ami andrō lawa'ō tōdōra enoni Lowalangi ira, bōrō me no labunu ami. 3 Lalau da'ō bōrō me lō saboto ba dōdōra Nama-Gu ba lō saboto ba dōdōra Ndra'o. 4 Ba hiza U'ombakha'ō khōmi da'ō iada'e, ena'ō na lalau khōmi da'ō, itōrō tōdōmi dania wa no U'ombakha'ō ia khōmi." "Tenga i'otarai wamōbōrō U'ombakha'ō da'ō khōmi, bōrō me faofao ami nasa khō-Gu. 5 Ba hiza iada'e numalō-Do khō zamatenge Ya'o; ba hewa'ae si manō samōsa lō ba gotaluami zanofu heza numalō'ō Ama? 6 Tobali abu dōdōmi iada'e, bōrō me no U'ombakha'ō khōmi. 7 Sindruhu niwa'ō-Gu khōmi: abōlō sōkhi ba khōmi, na mofanō Ndra'odo; bōrō na lō mofanō Ndra'o, lō mōi khōmi Zanolō andrō. Ba na mofanō-Do, Ufatenge Ia khōmi. 8 Ba na tohare Ia, I'otu'ō niha gulidanō dania wa no fasala wangerangerara sanandrōsa ba horō; awō wangerangerara sanandrōsa ba zomasi Lowalangi, awō huku soroi Lowalangi. 9 Fangerangerara sanandrōsa ba horō no fasala bōrō me lō faduhu dōdōra khō-Gu. 10 Fasala gōi wangerangerara sanandrōsa ba zomasi Lowalangi, bōrō me numalō Ndra'o khō Nama ba lō mi'ila-Do sa'ae. 11 No fasala gōi wangerangerara sanandrōsa ba huku soroi Lowalangi bōrō me no te'etu'ō huku khō ndra salawa ba gulidanō andre! 12 Oya nasa zomasi-Do Uwa'ō khōmi, ba hiza ambō nasa fa'abōlōmi wanema iada'e. 13 Ba hiza, na tohare Geheha Lowalangi sangombakha haniha Lowalangi andrō, I'ohē ami ba wa'aboto ba dōdō Lowalangi fefu. Lō Iwa'ō zomasi dōdō-Nia; hadia nirongo-Nia da'ō niwa'ō-Nia. Ba I'ombakha'ō khōmi fefu hadia zalua dania. 14 Ifolakhōmi Ndra'o, bōrō me Ihalō hadia ia zomasi Ndra'o Uwa'ō, ba aefa da'ō I'ombakha'ō khōmi. 15 No khō-Gu fefu hadia ia zi so khō Nama. Da'ō wa Umane, Ihalō moroi khō-Gu hadia nibe'e-Gu khōnia Eheha andrō, ba aefa da'ō I'ombakha'ō khōmi." 16 "Ma'ifu tō ba lō mi'ila Ndra'o sa'ae, ba lō ara aefa da'ō zui ifuli mi'ila Ndra'o." 17 So ōsa ndra nifahaō Yesu si faoma manofu khō nawōra, "Hadia geluaha fefu da'e? Imane: 'Ma'ifu tō ba lō mi'ila Ndra'o, ba lō ara aefa da'ō ifuli mi'ila Ndra'o dania.' Imane zui: 'Bōrō me numalō Ndra'o khō Nama.' " 18 Hadia gohitō dōdō-Nia wanguma'ō, "Ma'ifu tō? Lō aboto ba dōdōma hadia niwa'ō-Nia!" 19 I'ila Yesu wa omasi ira manofu khō-Nia. Bōrō da'ō Imane khōra, "Umane, ma'ifu tō ba lō mi'ila Ndra'odo, 'Ba lō ara aefa da'ō zui ifuli mi'ila Ndra'odo.' Hadia da'ō zi

tobali si nofumi khõ nawõmi? 20 Sindruhu niwa'õ-Gu khõmi: me'e ami dania ba mange'esi; ba omuso dõdõ niha gulidanõ. Abu dõdõmi dania, ba hiza fa'abu dõdõmi andrõ tobali fa'omuso dõdõ dania. 21 Na lõ ara tõ madono ndra alawe, ba abu dõdõnia, bõrõ me no inõtõnia wa'abu dõdõ. Ba na no tumbu nononia, olifu ndra alawe andrõ wa'abu dõdõnia; tobali somuso tõdõ ia, bõrõ samõsa ndraono sawuyu no tumbu ba gulidanõ. 22 Si manõ gõi ami: abu dõdõmi iada'e, ba na falukha zui Ndra'o khõmi dania, omuso dõdõmi; ba samõsa lõ si tola mangeheta fa'omuso dõdõmi andrõ. 23 Na no irugi ngaluo andrõ, lõ sa'ae misofu hadia ia khõ-Gu. Ya faduhu dõdõmi: Hadia manõ ni'andrõmi khõ Nama ba dõi-Gu, ibe'e khõmi Ama dania. 24 Irugi da'e lõ hadõi ni'andrõmi ba zi fao dõdõ-Gu. Bõi mifamalõ wangandrõ, ba mitema dania, ena'õ sindruhundruhu somuso tõdõ ami." 25 "Uwa'õ khõmi da'e faoma amaedola. Ba hiza so ginõtõnia dania, lõ U'oguna'õ gamaedola na fahuhuo Ndra'o khõmi. Lõ Ubini'õ wangombakha sanandrõsa khõ Nama. 26 Ba ginõtõ da'õ mi'andrõ dania khõ Nama ba dõi-Gu; ba lõ Uwa'õ wa Ya'o zangandrõ khõ Nama soguna khõmi, 27 bõrõ me I'omasi'õ ami Ama. I'omasi'õ ami bõrõ me mi'omasi'õ Ndra'o, awõ wa faduhu dõdõmi wa moroi khõ Nama Ndra'odo. 28 Sindruhu moroi khõ Nama Ndra'o, ba no mõi Ndra'o ba gulidanõ. Ba hiza iada'e Urõi gulidanõ ba mangawuli Ndra'o khõ Nama." 29 Aefa da'õ lamane khõ Yesu ira nifahaõ-Nia, "Lõ tobini wahuhuosa-U iada'e, Ama; lõ Õ'oguna'õ gamaedola. 30 Aboto ba dõdõma iada'e wa oi Õ'ila fefu hadia ia; ba lõ moguna lasofu khõ-U hadia ia Ama. Bõrõ da'õ faduhu dõdõma wa moroi khõ Lowalangi Ndra'ugõ." 31 Imane khõra Yesu, "Tenga awena faduhu dõdõmi iada'e? 32 Mitõrõ tõdõmi da'e: so ginõtõnia dania, ba no irugi inõtõ andrõ, tefazawili ami. Mangawuli ami ba nonomi zamõsana, ba mirõi Ndra'o ha tõ Ya'oya'o. Ba hiza, tenga ha Ya'o, bõrõ me fao khõ-Gu Nama. 33 Uwa'õ fefu khõmi da'e ena'õ misõndra wa'ohahau dõdõ bõrõ me ha sambua ami khõ-Gu. Lafakao ami dania niha gulidanõ. Ba mitaha dõdõmi! No Ulawa niha gulidanõ andre!"

17:1 Me no aefa fahuhuo Yesu, Ifaõga hõrõ-Nia miyawa ba mbanua ba Imane, "He Ama, no irugi inõtõnia iada'e. Folakhõmi Nono-U, ena'õ Ifolakhõmi Ndra'ugõ Ono-U gõi. 2 No Õbe'e ba danga Nono wa'abõlõ ba zi sagõrõ ulidanõ, ena'õ Ibe'e wa'auri sindruhundruhu Ono andrõ ba niha nitou'õ ba danga-Nia. 3 Da'e wa'auri sindruhundruhu; ena'õ aboto ba dõdõra Nama, Lowalangi sindruhu, ba aboto ba dõdõra Yesu, Razo Sangorifi nifatenge Nama. 4 No Ufolakhõmi Nama ba gulidanõ andre; ba no U'asiwai halõwõ nibe'e khõ-Gu. 5 He Ama! Folakhõmi Ndra'o iada'e faoma lakhõmi andrõ nirasoi-Gu ba zi fao Ama, fatua lõ muwõwõi gulidanõ andre. 6 No Ufa'ele'õ Nama ba niha gulidanõ andre si no Õtou'õ ba danga-Gu Ama. No okhõta Nama ira, ba no Ibe'e ira khõ-Gu Ama. No la'o'õ wamahaõ Nama. Ba no aboto ba dõdõra iada'e wa fefu nibe'e Nama khõ-Gu no moroi khõ Nama da'õ. 7 Ba no aboto ba dõdõra iada'e wa fefu nibe'e-Mõ khõ-Gu no moroi khõ-U da'õ. 8 No Ufa'ema khõra duria nibe'e Nama khõ-Gu; ba no latema. Aboto sibai ba dõdõra wa moroi khõ-U Ndra'odo awõ wa Ama zamatenge Ya'o. 9 Mangandrõ Ndra'o salahira. Lõ mangandrõ-Do salahira niha gulidanõ andre; mangandrõ Ndra'o ha ba niha nitou'õ ba danga-Gu, bõrõ tana khõ-Gu ira. 10 Fefu zi so khõ-Gu no khõ Nama gõi; ba fefu zi so khõ Nama no khõ-Gu. Tefolakhõmi Ndra'o ba khõra. 11 Mõido khõ Nama iada'e. Lõ torõi Ndra'o sa'ae ba gulidanõ; ba hiza so ira nasa ba gulidanõ. He Ama ni'amoni'õ! Rorogõ ira faoma fa'abõlõ-U, ya'ia wa'abõlõ si no Ibe'e Ama khõ-Gu, ena'õ ha sambua ira, si mane Ama si ha sambua ba khõ-Gu. 12 Me so Ndra'o khõra, no Urorogõ ira faoma fa'abõlõ dõi Nama, -- tõi nibe'e Nama khõ-Gu. No Urorogõ ira nitou'õ ba danga-Gu, ba samõsa lõ si taya ya'ira, baero ndra si no lõ tola lõ elungu; ena'õ alua zi no tesura ba Mbuku Ni'amoni'õ. 13 Iada'e numalõ Ndra'o khõ nama. U'ombakha'õ da'õ fatua so Ndra'o ba gulidanõ; ena'õ sindruhundruhu larasoi wa'omuso dõdõ-Gu. 14 No Ufa'ema khõra wamahaõ Nama, ba fatiu dõdõ niha gulidanõ khõra, bõrõ me tenga tana khõ gulidanõ ira, si mane Ya'o gõi si tenga tana khõ

gulidanō. 15 Lō U'andrō ena'ō Ōheta ira moroi ba gulidanō andre, hiza angandrōwa-Gu ena'ō Ōrorogō ira moroi ba danga Gafōkha andrō. 16 Tenga tana khō gulidanō Ndra'o, si mane ya'ira gōi tenga khō gulidanō. 17 Faoma fa'aduhu-Mō Ama, oniagō ira tana khō-U; Taroma Li-Mō zindruhu. 18 Si mane famatenge Nama Ya'o ba gulidanō; si manō gōi Ufatenge ira ba gulidanō. 19 Soguna khōra wa ha khō Nama Utou'ō Ndra'o, ena'ō sindruhundruhu tobali ira niha nituyu tana khō Nama. 20 Tenga ha khōra andre mangandrō Ndra'o. Mangandrō-Do gōi salahi niha sedōna faduhu dōdō moroi ba halōwō famaduhu'ō turia somuso dōdō andrō. 21 U'andrō khō Nama, ena'ō ha sambua ira, si mane fa ha sambua Nama khō-Gu ba ha sambua Ndra'o khō Nama. Ena'ō ha sambua ira fa tola faduhu dōdō niha gulidanō wa Ama zamatenge Ya'o. 22 No Ufolakhōmi ira faoma lakhōmi andrō nibe'e Nama khō-Gu, ena'ō ha sambua ira ba da'ō, si mane Ama si ha sambua khō-Gu; 23 si manō gōi Ndra'odo khōra, ba ha gōi sambua Nama ba khō-Gu. Bōrō da'ō aboto ba dōdō niha gulidanō andre wa Ama zamatenge Ya'o, awō wa Ō'omasi'ō ira Ama, si mane fa'omasi-U Ndra'o. 24 He Ama! No Ōbe'e ba danga-Gu ira. Omasido na fao ira ba nahia si so Ya'o, ena'ō la'ila lakhōmi-Gu; ya'ia lakhōmi nibe'e Nama khō-Gu, bōrō me I'omasi'ō Ndra'o Ama fatua lō muwōwōi gulidanō andre. 25 He Ama satulō! Lō aboto ba dōdō niha gulidanō Nama; ba hiza aboto ba dōdō-Gu Nama; ba aboto ba dōdō niha andre wa Ama zamatenge Ya'o. 26 No U'ombakha'ō Nama khōra; ba lō aetu Ulau zi manō, ena'ō la'ila gōi wa'omasi Nama ndra'o ba tobali ha sambua Ndra'o khōra."

18:1 Me no aefa mangandrō Yesu khō Lowalangi, mofanō Ia awō ndra nifahaō-Nia, la'ōtō mbombo Kidrona. Ba so kabu ba da'ō. Numalō Yesu awō ndra nifahaō-Nia ba kabu andrō. 2 I'ila Yuda si manga mbōli nahia andrō, bōrō me asese so Yesu ba da'ō awō nifahaō-Nia. 3 Numalō gōi Yuda ba da'ō. I'ohē zaradadu awō zanaro ba Nomo Zo'aya nifatenge ndra ere sebua awō ndra Farizai'o. La'ohē wandru ba sulu awō wangōna. 4 I'ila Yesu hadia zedōna alua khō-Nia. I'ondrasi ndra niha andrō ba Imane khōra, "Haniha ni'aluimi?" 5 Lamane, "Yesu andrō, banua Nazareta." Imane khōra Yesu, "Ya'odo da'ō." No muzizio gōi Yuda si manga mbōli andrō awōra ba da'ō. 6 Me Imane Yesu, "Ya'odo da'ō," awuwu ira furi ba oi alau tou ba danō. 7 Ifuli zui Iofu khōra Yesu Imane, "Haniha ni'aluimi?" Lamane wanema li, "Yesu andrō, banua Nazareta." 8 Imane Yesu, "No nasa Uwa'ō Ya'odo da'ō. Ba na sindruhu Ya'o ni'aluimi, akha mofanō zato andre." ( 9 Ba zi manō, alua zi no tohōna muwa'ō, imane: "He Ama, samōsa lō si taya niha nibe'eu ba danga-Gu.") 10 So sara wōda khō Zimoni Fetero me luo da'ō. Isōbi wōda andrō ba ihare'ō khō zawuyu gere sebua irege aetu dalinga kambōlō. Malikho dōi zawuyu andrō. 11 Imane khō Wetero Yesu, "Fuli saembugō wōda andrō! Hadia, ba dōdōu lō omasi-Do Utaōgō wamakao andrō nibe'e Nama khō-Gu?" 12 Lara'u Yesu ira saradadu awō gomandra ba ira sanaro andrō niha Yahudi. 13 Si fōfōna la'ohē Yesu khō Hanasi, ama matua Gayafa. Ere sebua Gayafa ba ginōtō andrō. 14 Ya'ia zo'amenesi niha Yahudi wa abōlō sōkhi ha samōsa zi mate salahi zato moroi na tekiko zi sambua soi. 15 La'o'ō Yesu ira Simoni awō nifahaō bō'ō si samōsa. Ba i'ila ere sebua nifahaō si samōsa andrō; andrō lō fao ia we'amōi ba golayama nomo gere sebua, 16 ibaloi Fetero baero ba mbawa ndrūhō. Numalō baero nifahaō ni'ila gere sebua, fahuhuo ia ba ndra alawe sanaro bawa ndrūhō, ba aefa da'ō i'ohē Wetero si bakha. 17 Muhede ndra alawe sanaro bawa ndrūhō andrō khō Wetero imane, "He, hadia tenga ya'ugō samōsa ba gotalua nifahaō-Nia gōi?" Imane Fetero, "Tenga." 18 No lahaogō galitō ira sawuyu awō ndra sanaro, ba lalau moleu ba zi fasui alitō andrō, bōrō me okafu hao danō me inōtō da'ō. So Wetero ba da'ō woleu ba gotaluara. 19 Ibe'e wanofu ere sebua khō Yesu sanandrōsa ba nifahaō-Nia awō wamahaō-Nia. 20 Itema li Yesu Imane, "Lō aetu fahuhuo Ndra'o fōna niha sato. Mamahaō Ndra'o ba nomo wangandrō awō ba nahia gowulua niha Yahudi. Lō irai Ubini'ō wanguma'ō hadia ia. 21 Hana wa ōsofu khō-Gu? Sofu khōra si no mamondrongo famahaō-Gu. Sofu khōra hadia zi no

Uwa'õ khõra lõ tola lõ'õ la'ila." 22 Me Imanõ wehede Yesu, samõsa zanaro ba da'õ zamalisi Ya'ia, sanguma'õ, "Ha lõ barani Ndra'ugõ wehede si manõ khõ gere sebua!" 23 Itema li Yesu, "Na no Uwa'õ hadia ia zi fatimba, ombakha'õ hadia zi fatimba andrõ! Ba hiza sindruhu niwa'õ-Gu andrõ, ba hana wa õfalisi Ndra'o?" 24 Aefa da'õ ifatenge niha Hanasi wolohe Yesu khõ Gere Sebua Kayafa, no la bõbõ danga-Nia. 25 No muzizio ba da'õ nasa Wetero woleu ya'ia. Lasofu khõnia niha lamane, "Hadia, tenga ya'ugõ gõi samõsa ba gotalua nifahaõ niha andrõ?" Itimbagõ Fetero. Imane, "Tenga!" 26 Samõsa ba gotalua zawuyu gere sebua andrõ, si fahatõ khõ zawuyu andrõ ni'ewa Wetero talinga, imane, "Hadia, tenga ya'ugõ ni'ilagu zi fao khõ-Nia ba kabu andrõ?" 27 Imane zui Fetero, "Tenga," -- ba faudu sibai ba ginõtõ da'õ miwo manu. 28 Meno aefa da'õ la'ohe Yesu ba nomo gubernur. Ahulõ sibai wongi me inõtõ da'õ. Lõ mõi bakha ba nomo gubernur ndra niha Yahudi. Ena'õ lõ ta'unõ ira molo'õ agama, bõrõ me fao ira wemanga Gõ Fasa. 29 Bõrõ da'õ mõi baero Wilato wanofu khõra imane, "Hadia wangadumi ba niha da'e?" 30 Lamane, "Lõ ma'ohe Ia khõ Gubernur na lõ olalõwa-Nia." 31 Imane Filato khõra, "Mihalõ Ia, mifareso ba mi'etu'õ huku khõ-Nia molo'õ huku agama ba khõmi!" Ba hiza lamane niha Yahudi, "No tetenawa ndra'aga wame'e huku famunu ba niha." ( 32 Alua zi mane faudu ba zi no Iwa'õ Yesu, sanandrõsa ba wa'amate-Nia.) 33 Ifuli mõi bakha ba nomo Wilato ba ikaoni Yesu. Aefa da'õ isofu khõ Yesu imane, "Hadia Ya'ugõ andre Razo niha Yahudi?" 34 Imane wanema li Yesu, "Hadia fanofumõ samõsa da'e Tuha, ma so niha bõ'õ zi no mangombakha khõu sanandrõsa khõ-Gu?" 35 Itema li Filato imane, "Hadia niha Yahudi ndra'odo? Soi-Mõ samõsa awõ ndra ere sebua zame'e Ya'ugõ ba danga-Gu. Hadia zi no Õlau?" 36 Imane Yesu, "Tenga famatõrõ ba gulidanõ andre wamatõrõ-Gu. Na famatõrõ gulidanõ wamatõrõ-Gu, ba molawa niha si fao khõ-Gu ena'õ fabõi tebe'e Ndra'o ba danga niha Yahudi. Ba hiza sindruhu tenga soroi gulidanõ wamatõrõwa-Gu!" 37 Isofu khõnia Filato imane, "Na si manõ hadia sindruhu razo Ndra'ugõ?" Itema li Yesu imane, "Ya'ugõ zanguma'õ wa razo Ndra'odo. Ha sambalõ gohitõ dõdõ wa tumbu ba mõi Ndra'o ba gulidanõ andre, ya'ia, ba wamaduhu'õ sindruhu andrõ. Niha soroi zindruhu andrõ, zamondrondrongo khõ-Gu." 38 Isofu khõnia Filato imane, "Hadia zindruhu andrõ?" Ba mõi baero zui Wilato, imane ba niha Yahudi, "Lõ nisõndragu olalõwa-Nia. 39 Ba hiza molo'õ si to'õlõ u'efa'õ samõsa niha nikuru ba Ngaluo Gowasa Fasa. Hadia, omasi ami u'efa'õ razo niha Yahudi andrõ khõmi?" 40 Latema linia mu'ao ira lamane, "Bõi! Bõi efa'õ Ia! Efa'õ Mbaraba!" (Baraba no samõsa sorabu.)

19:1 Aefa da'õ ifahalõ'õ Yesu Filato ba ifabõzi'õ. 2 Lafazõkhi dakula wa'arazo moroi ba ndroi ira saradadu si so ba da'õ, aefa da'õ labe'e ba hõgõ Yesu. Aefa da'õ lafonukha Yesu faoma baru sobowo doru, 3 la'ondrasi Ia ba lamane, "Ya'ahowu razo niha Yahudi!" Aefa da'õ latafari Ia. 4 Numalõ baero zui Wilato ba imane ba niha sato andrõ, "Ya'e, mifaigi! U'ohe baero Ia iada'e, ena'õ aboto ba dõdõmi wa lõ nisõndra-Gu olalõwa-Nia." 5 Numalõ baero Yesu, no Ifake dakula wa'arazo moroi ba ndroi awõ mbaru sobowo doru andrõ. Imane khõra Filato, "Mifaigi! Ya'e nihania!" 6 Mu'ao ndra ere sebua awõ ndra sanaro me la'ila Yesu, lamane, "Forõfa Ia! Forõfa Ia!" Imane khõra Filato, "Mihalõ Ia ba miforõfa manõ. Ma'ifu lõ nisõndra-Gu olalõwa-Nia." 7 Latema li ira niha Yahudi, "Molo'õ huku si so khõma, nihuku famunu Ia bõrõ me Iwa'õ Ono Lowalangi Ia." 8 Me irongo da'õ Filato abõlõbõlõ nasa wa'ata'unia. 9 Andrõ mõi ia bakha ba nomo ba isofu khõ Yesu imane, "Hezo moroi Ndra'ugõ?" Ba lõ Itema li Yesu. 10 Imane khõnia Filato, "Hadia lõ omasi Ndra'ugõ fahuhuo khõgu? Tõngõni, he! So kuaso khõgu wangefa'õ Ya'ugõ, ba so gõi kuaso khõgu wamorõfa Ya'ugõ!" 11 Itema li Yesu Imane, "Na tenga nibe'e Lowalangi khõu kuaso andrõ, ba ma'ifu lõ kuasou khõ-Gu. Bõrõ da'õ niha same'e Ya'o ba dangau abõlõ ebua horõra moroi khõu." 12 Me irongo da'õ Filato, i'alui lala wangefa'õ Yesu. Ba hiza mu'ao'ao niha Yahudi lamane, "Na õ'efa'õ

Ia, tenga awō Kaizaro ndra'ugō! Niha sanguma'ō razo ia, no si fa'udu khō Kaizaro!" 13 Me irongo da'ō Filato, i'ohe baero Yesu, aefa da'ō ilau mudadao ba gurusi wanguhuku sotōi Nibale kara. (Ba li Heberai'o lafotōi Gabata.) 14 Me inōtō da'ō no arakha laluo; ba tebōrōtaigō Gowasa Fasa ba zi tanō owi. Imane Filato ba niha Yehuda, "Ya'e razomi!" 15 Mu'ao ira lamane, "Nibunu Ia! Nibunu Ia! Forōfa Ia!" Imane Filato, "Hadia omasi ami miforōfa Razomi?" Latema li ira ere sebua lamane, "Ha Kaizaro Razo khōma!" 16 Ba ibe'e Yesu ba dangara Filato ena'ō laforōfa. Lahalō Yesu ba mofanō ira. 17 La'ohe baero Yesu, I'osa'ō samōsa rōfa-Nia numalō ba nahia sotōi "Sole Hōgō". (Lafotōi Gologota ba li Heberai'o.) 18 Ba da'ō laforōfa Ia. So darua danō bō'ō awō-Nia; samōsa ba gambera, samōsa ba gambōlō ba Yesu ba gotalua. 19 Ba rōfa Yesu, ifawa'ōgō Filato ena'ō lasura, lamane: "Yesu moroi ba Nazareta, Razo Niha Yahudi". 20 Ato niha Yahudi sombaso nisura andrō, bōrō me lō arōu nahia wamorōfa Yesu moroi ba mbanua. Tesura wehede andrō ba rōfa Yesu ba li Heberai'o, ba li Latina, awō ba li Yunani. 21 Lamane khō Wilato ira ere sebua awō niha Yahudi, "Bōi sura 'Razo niha Yahudi', ōmane wanura, 'Imane niha andre, Razo niha Yahudi Ndra'o.' " 22 Imana li Filato imane, "Tebai tebulō hadia zi no usura!" 23 Me no aefa laforōfa Yesu ira saradadu, lahalō nukha-Nia. Labagi ōfa nukha andrō: dozi ira manema zamōsana. Lahalō gōi mbaru-Nia sebua. Lō tagutagu mbaru sebua andrō -- nisoso i'otarai moroi yawa numalō mitou. 24 Faoma lamane khō nawōra ira saradadu andrō, "Bōi tataba mbaru sebua andre. Da talau fadahōdahō wangahonogōi haniha zanōndra baru sebua andre." Alua zi manō ena'ō itōrō nisura bakha ba Mbuku Ni'amoni'ō, sanguma'ō: "Labagibagi khōra nukhagu, ba lalau fadahōdahō ba mbarugu sebua." No lafalua ira saradadu zi manō. 25 Ba zinga rōfa Yesu no muzizio nina Yesu, talifusō nina-Nia ira alawe Maria fo'omo Kelofasi, awō Maria Magadala. 26 Ifaigi nina-Nia Yesu ba no gōi muzizio nifahaō-Nia ni'omasi'ō ba da'ō. Imane Yesu khō nina-Nia, "He Ina, faigi, hiza nonou." 27 Aefa da'ō imane Yesu khō nifahaō andrō, "Faigi, hiza ninau." I'otarai da'ō, torōi nina Yesu ba nomo nifahaō andrō. 28 Aefa da'ō aboto ba dōdō Yesu wa no awai fefu hadia ia; faudu ba nisura bakha ba Mbuku Ni'amoni'ō, si lō tola lō'ō alua, imane, "Owōkhi dōdō-Gu." 29 So ba da'ō mako safōnu agu saisō. La'ungugō mbunga kara ba nagu andrō, ba latuwu ba mbalō geu. La'oro'ō mbunga kara andrō ba mbewe Yesu. 30 Itandra nagu andrō ba Imane, "No awai!" Ileagō hōgō-Nia ba aetu noso. 31 Luo zumaha me luo da'ō, inōtō wangōhōna ba Gowasa Fasa. Lō omasi niha Yahudi na torōi mboto niha niforōfa andrō irugi luo Sabato. Bōrō me ngaluo sebua luo Sabato. La'andrō niha Yahudi khō Wilato ena'ō itehēgō khōra lafatō gahe niforōfa andrō ba labe'e tou moroi ba rōfa. 32 Maoso ndra saradadu lafatō gahe si fōfōna, aefa da'ō ganete da'ō, darua manō nawō Yesu niforōfa. 33 Ba me larugi nahia Yesu, la'ila wa no mate Ia. Andrō lō lafatō gahe-Nia. 34 Lahandro ngai Yesu faoma toho saradadu andrō; mōi baero ndro si faruka idanō moroi ba ngai-Nia. 35 Niha sangila ngawalō zalua andrō zangombakha fefu da'e, ena'ō faduhu dōdōmi. Ba sindruhu niwa'ōnia; i'ila wa sindruhu da'ō. 36 Alua zi manō ena'ō itōrō niwa'ō ba Mbuku Ni'amoni'ō, ya'ia wa, "Ma'ifu lō tōla-Nia nifatō". 37 No tesura gōi bakha ba Mbuku Ni'amoni'ō, si mane: "Lafaigi Ia niha samahō Ya'ia." 38 Aefa da'ō i'andrō Yosefo soroi mbanua Garimatea andrō khō Wilato ena'ō itehēgō khōnia wanga'i boto Yesu. (Solo'ō khō Yesu Yosefo andrō ba zi lō oroma, bōrō me ata'u ia ndra salawa niha Yahudi.) Itehēgō khōnia Filato, mōi Yosefo wanga'i boto Yesu. 39 Mōi gōi Nikodemo fao khō Yosefo. Ya'ia andrō zi no irai mōi khō Yesu ba zi bongi. I'ohe gemuri awō gaharu Nikodemo. Fa'oya fefu mato tōlu ngafulu kilo wa'oya. 40 Darua ira lahalō mboto Yesu ba la'olohuni faoma muko ba lalau zamohua molo'ō hada wogo'o niha ba niha Yahudi. 41 So sambua kabu ba nahia wamorōfa Yesu andrō. Ba kabu andrō so lewatō si bohōu, si lō irai mu'oguna'ō wogo'o niha. 42 Me ahatō lewatō andrō awō wa no ahatō luo Sabato, andrō wa labe'e mboto Yesu ba lewatō andrō.



20:1 Sahulō sibai wongi hari Migu, me ogōmi na, numalō ba lewatō Maria Magadala. I'ila ba da'ō lagōlagō lewatō no tefagaōlō moroi ba mbawa lewatō. 2 Fagohi ia wangalui Simoni Fetero awō nifahaō tanō bō'ō ni'omasi'ō Yesu, imane khōra, "No lahalō niha mboto Yesu; lō ma'ila heza labe'e iada'e!" 3 I'anema'ō numalō Wetero awō nifahaō bō'ō andrō ba lewatō. 4 Lalau fagohi darua ira, ba hiza abōlō alio nifahaō bō'ō andrō moroi khō Wetero; ofōna ia irugi lewatō moroi khō Wetero. 5 Me ifaigi bakha lewatō, i'ila muko si so ba da'ō, ba hiza lō mōi sa ia bakha. 6 Aefa da'ō tohare Zimoni Fetero moroi furi, idōlō bakha ba lewatō andrō. Ba i'ila nukha muko si so ba da'ō, 7 ba muko bōbō hōgō Yesu lō hadōi ba da'ō. No tefazaumba muko andrō. 8 Aefa da'ō mōi gōi bakha ba lewatō nifahaō si'ofōna mondrugi no mege. I'ila gōi fefu da'ō ba faduhu dōdōnia. ( 9 Irugi ginōtō andrō lō nasa saboto ba dōdōra nisura ba Mbuku Ni'amoni'ō wa ifuli auri Ia moroi ba wa'amate.) 10 Aefa da'ō mangawuli ndra nifahaō Yesu andrō. 11 Ilau me'e Maria ba zinga lewatō andrō. Ba fatua ilau me'e, ifaōndrō ia ba ifaigi bakha ba lewatō, 12 ba i'ila darua mala'ika sobaru safusi. No dumadao mala'ika andrō ba nahia mboto Yesu mege. Si samōsa dumadao ba gamaudu hōgō, ba si samōsa tō dumadao ba gamaudu gahe. 13 Lasofu ira mala'ika andrō khō Maria, "He Ina, hana wa me'e ndra'ugō?" Ite ma li Maria imane, "No lahalō niha Zo'aya ya'o, ba lō u'ila heza labe'e Ia!" 14 Me no aefa iwa'ō da'ō Maria ifaigi furi ba i'ila Yesu no muzizio ba da'ō. Ba hiza lō aboto ba dōdōnia wa Yesu da'ō. 15 Isofu khōnia Yesu Imane, "He Ina, hana wa me'e ndra'ugō? Haniha ni'aluimō Ina?" Iwalinga tuka kabu niha andrō Maria. Andrō imane Maria, "He Ama, na no ōfawu'a Ia moroi ba da'e, ombakha'ō khōgu heza ōbe'e Ia. Mōi ndra'o dania wanga'i Ya'ia." 16 Imane Yesu khō Maria, "He Maria!" Ifaigi Yesu Maria ba imane ba li Heberai'o, "Rabuni!" (Eluahania "Guru".) 17 Imane Yesu khō Maria, "Bōi babaya Ndra'o. Bōrō me lō si mōi Ndra'o khō nama. Ae'e khō ndra talifusō-Gu ba ombakha'ō khōra, ōmane. Mōi Ndra'o khō Nama-Gu ba amami gōi; khō Lowalangi-Gu ba Lowalangimi gōi." 18 Numalō Maria wangombakha khō ndra nifahaō Yesu wa no i'ila Zo'aya awō wa no Iwa'ō fefu da'ō khōnia So'aya. 19 Me luo Migu andrō gōi, me bongi, no so ndra nifahaō Yesu ba zi sambua omo si no mukusi fefu mbawa ndrūhō; bōrō me ata'u ira ndra salawa niha Yahudi. I'anema'ō tohare Yesu ba muzizio Ia ba gotaluara, ba Imane, "Ya'ohahau dōdōmi!" 20 Me no aefa Iwa'ō da'ō, Iforoma'ō khōra danga awō dōla nosu-Nia. Ba omuso sibai dōdōra me la'ila Zo'aya. 21 Ifuli Imane khōra Yesu, "Ya'ohahau dōdōmi! Si mane famatenge Nama Ya'o, si manō gōi dania wamatenge-Gu ami." 22 Me no aefa Iwa'ō da'ō Ihehaini ira hanuhanu-Nia ba Imane khōra, "Mitema Geheha Lowalangi. 23 Na so ni'efa'ōmi horō, ba I'efa'ō da'ō Lowalangi. Ba na so zi lō mi'efa'ō horō, ba lō gōi I'efa'ō da'ō Lowalangi." 24 Toma (nifotōi si "Faero") samōsa ba gotalua nifahaō Yesu. Lō hadōi Toma me mōi Yesu khō ndra nifahaō-Nia. 25 La'ombakha'ō khō Toma ira nifahaō tanō bō'ō lamane, "No ma'ila Zo'aya!" Ite ma li Toma imane, "Na lō ni'ilagu lahe gosō'osō ba danga-Nia ba na lō ubabaya ngai-Nia, ba lō faduhu dōdōgu." 26 Ba fitu bongi aefa da'ō, so ndra nifahaō Yesu ba nomo andrō, ba so gōi Doma ba da'ō. No muduhō fefu mbawa ndrūhō. Ba i'anema'ō tohare Yesu ba muzizio Ia ba gotaluara, Imane, "Ya'ohahau dōdōmi!" 27 Aefa da'ō Imane Yesu khō Doma, "Be'e dangau ba da'e, ba faigi danga-Gu. Oro'ō dangau ba babaya ngai-Gu. Bōi mangiwa sa'ae dōdōu. Ya faduhu dōdōu sa'ae!" 28 Imane Toma khō Yesu, "So'aya ya'o! Ba Lowalangigu!" 29 Imane Yesu khōnia, "Hadia faduhu dōdōu bōrō me no ō'ila Ndra'o? Ya'ahowu niha si faduhu tōdō khō-Gu, hewa'ae lō i'ila Ndra'o!" 30 Wa oya nasa zahōlihōli dōdō nilau Yesu fōna ndra nifahaō-Nia, ba hiza lō musura fefu zahōlihōli dōdō andrō bakha ba zura andre. 31 Musura fefu da'e ena'ō faduhu dōdōmi wa Yesu andrō no Razo Sangorifi nifabu'u Lowalangi, Ya'ia andrō Nono Lowalangi. Ba wa'afaduhu dōdō khō-Nia misōndra wa'auri ba wa'abōlō-Nia.

21:1 Aefa da'ō ifuli Iforoma'ō Ia Yesu samuza tō khō ndra nifahaō-Nia ba mbawa Diberia. Si mane wangoroma'ō-Nia Ya'ia: 2 Samuza ma'ōkhō owulo ndra Simoni Fetero ba Toma nifotōi si Faero, ba Natanaeli moroi ba Kana ba danō Galilea, iraono Zebedai'o, awō darua tō nifahaō Yesu tanō bō'ō. 3 Imane Simoni Fetero ba danō bō'ō andrō, "Mōi ndra'o manga'i i'a." Lamane tanō bō'ō khōnia, "Fao gōi ndra'aga." Mofanō ira, momōi yawa ba dundraha. Ba hiza sara wongi lō ahulu ira, sara i'a lō lasōndra. 4 Me ibōrōtaigō tumbu luu, tohare Yesu, no Ilau muzizio ba gawu; ba hiza lō la'ila wa Yesu da'ō. 5 Imane khōra Yesu, "He iraono, hadia so khōmi gi'a?" Latema li, lamane, "Lō'ō." 6 Imane khōra Yesu, "Milau ndrialami tanō ba gambōlō dundraha, ba misōndra dania gi'a." Lalau ndrialara ba nidanō, ba hiza tebai ira wondrōni mangawuli bōrō wa'oya gi'a bakha ba ndrialara. 7 Imane nifahaō ni'omasi'ō Yesu andrō khō Wetero, "Hiza Zo'aya!" Me irongo Fetero wanguma'ō, "Hiza Zo'aya!", i'anema'ō ifake mbarunia sebua mangawuli (bōrō me no iheta mbaru sebua andrō khōnia) ifazaumba ia bakha ba nidanō. 8 La'o'ō ia ira nifahaō bō'ō faoma tundraha numalō ba danō, awō wa ladōni ndrialara andrō safōnu i'a. Lō arōu i'otarai danō so ira, ha mato otu mete. 9 Me mōi ira tou moroi ba dundraha, la'ila galitō awō gi'a yawa; ba so gōi roti ba da'ō. 10 Imane khōra Yesu, "Mi'ohe ba da'e mato ha'uga rozi gi'a nisōndrami." 11 Numalō ba dundraha Zimoni, ba idōni ndrialara yawa ba danō. Afōnu ndrialara andrō i'a segesolo; otu a lima wulu a tōlu rozi wa'oya fefu. Ba hewa'ae oya gi'a andrō, ba lō asika ndrialara. 12 Imane khōra Yesu, "Mi'aine manga ita." Ba samōsa lō si barani ba gotalua ndra nifahaō wanofu khō-Nia, "Haniha Ndra'ugō andre, Ama?" Bōrō me no la'ila Ia wa So'aya. 13 Ihatō'ō Ia khōra Yesu ba Ihalō roti andrō, ba Ibe'e khōra. Si manō gōi wolau-Nia ba gi'a andrō. 14 Da'e zi medōlu kali I'oroma'ō Ia Yesu khō ndra nifahaō-Nia me no auri Ia mangawuli moroi ba wa'amate. 15 Me no aefa manga ira, Imane Yesu khō Zimoni Fetero, "He Simoni ono Yohane, hadia abōlō omasi ndra'ugō Ndra'o moroi ba niha andre?" Imana li Fetero imane, "Ya'ia, So'aya. Ō'ila wa u'omasi'ō Ndra'ugō." Imane khōnia Yesu, "Kubaloi mbiribiri-Gu." 16 Ifuli Isofu khōnia Yesu no mendrua kali, "He Simoni ono Yohane, hadia ō'omasi'ō Ndra'o?" Imane Fetero, "Ya'ia So'aya. Ō'ila wa u'omasi'ō Ndra'ugō." Imane khōnia Yesu, "Kubaloi mbiribiri-Gu." 17 Ba zi medōlu kali Isofu khōnia Yesu, "He Simoni ono Yohane, hadia omasi'ō Ndra'o?" Ifuli zui itema li Fetero, "He So'aya, no Ō'ila fefu hadia ia. Ō'ila wa u'omasi'ō Ndra'ugō!" Imane Yesu khō Wetero, "Kubaloi mbiribiri-Gu. 18 Sindruhundruhu niwa'ō-Gu khōu: Me ono matua na ndra'ugō, ba ya'ugō zama'anō ya'ugō ba numalō ndra'ugō ba zomasi'ō. Ba hiza na no atua ndra'ugō dania, ba ō'oro'ō dangau wangandrō tolo ba niha bō'ō wama'anō ya'ugō ba ba wolohe ya'ugō ba nahia si lō omasi'ō." 19 (Faoma fehede andrō I'oroma'ō Yesu hewisa wa'amate Wetero dania ba wamolakhōmi Lowalangi.) Aefa da'ō Imane Yesu khō Wetero, "Tabu o'ō Ndra'o!" 20 Me ifakhōlō ia Fetero, i'ila moroi furi nifahaō ni'omasi'ō Yesu. (Ya'ia andrō zi dadao ba zinga Yesu me manga ira, sanofu khō Yesu, "He So'aya, haniha zi manga mbōli Zo'aya?") 21 Me i'ila nifahaō andrō Fetero, isofu Fetero khō Yesu, "He So'aya, hewisa dania niha andre?" 22 Imana li Yesu Imane, "Na omasido auri ia irugi mangawuli Ndra'o, hana ōhalō fōkhō hōgōu da'ō. O'ō manō Ndra'odo!" 23 Tobali tehōngō duria ba gotalua ndra nifahaō Yesu wa lō mate dania nifahaō andrō. Ba hiza sindruhunia tenga da'ō niwa'ō Yesu wa lō mate dania nifahaō andrō; Da'e niwa'ō Yesu: "Na omasido auri ia irugi mangawuli Ndra'o, hana wa ōhalō fōkhō hōgōu!" 24 Nifahaō andrō zamaduhu'ō fefu salua andrō. Ya'ia gōi zanura. Ba aboto ba dōdōda wa sindruhu niwa'ōnia andrō. 25 Oya nasa ngawalō nilau Yesu. Ba na muzarazara fanura, uwa'ō tōdōgu ambō zi sagōrō ulidanō andre nahia mbukubuku nisura andrō.